

ESUSËN UAN ISMIAID

Nëidba chuiquin Uanën dada uaid

1 ¹Nuquin Papan tantiamiac Esuquidistun ismeboedquio chuibanquin dada uaic nebi. Esusbëd ictenedquio aton yuambo Uan nebi. —“Nuquin Papa aton Mado Esusbëdi abitedishun Icho icquin Satanas chedo ambi yuaido matsesbëdta cuidquimbi Esus tantiaquido abëdi tabadmendac,” quequin ma nuqui tantiaquidon tantianu —quequin Nuquin Papan chiac Esuquidistun ismeposhi. Esusën namiac abi yacnoshon uaid mayan bëdabontsen ismeposhi. ²Adoac Nuquin Papan chiaidbëdta Esuquidistun ismeboedquio chuibanquin dada uaic nebi. Abimbo caimbique. Tantia. ³Nëid dada uaid tantiaish chuibanquido ambi chiaidobëdi: —Ambi chiacpadomboen nëbi Esusën nanushe. Chieshtoenquio icquin abi tantiec bëdamboec tabadnuna —quiash bëdamboec tabadsho Nuquin Papan bëdambo icmendac.

Esus tantiaquidon iste dada uaid

⁴Nidaid utsi Asia caid yacno tabadquidon Esus tantiaquidon mimbi iste dada uaic nebi. Sietetedi shubu dadpen icquid yacno-yacnomboec tabadquido Esus tantiaquido mibi chuiquin dada uaic nebi. —Ambi nacpadomboen Nuquin Papan aton Mado Esusbëdtan bëdamboen isquin

bëdambo icmepashun. Adembidi aton Mayanën bëdambo icmepashun —quequin mibi tantiembi. Nidaid uabi yec ëndenquimboshë icpampidi nëbi adquid yec nibëdantiapimbo icquid Nuquin Papambo nec. Aton Mayanën abi bëisec tabadquidëmbi nuquibëdtsen icquin Nuquin Papan chiaid nuqui tantiamec. ⁵Aton Mado Esuquidistu Nuquin Papan bëdamboen iste tantiamequidquio nec. Abia aton dada unëstiapimbo icquid icmequin uincuemiadquio nec. Adquid yec abitedishun Icbombo nec. Ambiuiddtsëqui chuiquid daba abitedimbo namendac. Aidquio nuqui tantiaquidquio yec nuqui icsaid bedshunuec abided cuidadec unëspondash. ⁶Abi tantiaisho Esusën aton Papan yuabo nuqui icmec. Aden Nuquin Papan chiacpadomboen naquin: —Con matses bëdamboen ista —quequin Nuquin Papa chianequidquio nuqui nec. Adquido icquin: —Esus bëdamboshë iquéc. Abitedishun Icbombo nec. Ambi chiacpadomboen abitedishun napashun —canuna ënenquio icquin. ⁷Aidquio tantianuna. Nëbi chonoshe. Abitedishun Icbombo yec dacuëdampamboec chosho matses abitedishunquio isendac. Con matses ambi unës uaondaidquio chosho istanec: —Padtemboshë. Ashibi cuidpec —quetanec cuidte tantiec dacuëdec natiaic shubiendac. Esus tantiesabo

utsibotsen adecbidi abi cuidte tantiec natiac shubiendac.

⁸Adnubien Nuquin Papan chioshi. —Ëmbi tantiacmaid nibëdec. Abitedi comapenen tantiaquidquo nebi. Nidaid uabi yec ictenedi nebi. Nëbi adquid yec nibëdantiapimbo icquidquo nebi. Adquid yec abitedishun Icbombo nebi —queposh Nuquin Papa. Aidquio tantianuna.

Dacuëdampamboecnuc Esusën ismiaid

⁹Esusbëd ictenedi Uan nebi. Mibëdtan Esus tantiaquid yec min utsibimboecquid nebi. Mibi yacpadembidi Esus tantiashe Esus tantiesabon chieshëmpondashi. Adoac Esusën namiacpadec chieshtoenuio iquebi. Chieshtoesa yec Nuquin Papabëd tabadtequido nuqui nec. Esus tantiesabon chieshënuquin quënën nauedacimboen cuenuio icnuen acte dapa nuacquid mad caid nënantan nidaid icquid Pacmos caidën tsadumpondashi. Adondac Pacmos caidën abi tsadec nebi. ¹⁰Dominco ushën Esus tantiec tsadshobini Nuquin Papan Mayanën tantiameposh. Adoac cachocuësh shoncate shoncacimboec comapenec onquesho tantiapombi. Ushenuio icquimbi ushqin isacimboen tantiombi. ¹¹Naden chuiposhi. —Nëbi mibi dadpen ismenu. Adoac ëmbi ismeboedtedi dada uabanta. Nëidtedishun iste dada uata. Nëidic shubu dadpen icquid Epeso caid yacnocquidon. Nëidic shubu dadpen icquid Esmidina caid yacnocquidon. Nëidic shubu dadpen icquid Pedcamo caid yacnocquidon. Nëidic shubu dadpen icquid Tiatida caid yacnocquidon. Nëidic shubu dadpen icquid Sadis caid yacnocquidon. Nëidic shubu dadpen icquid Pidadepia caid yacnocquidon. Nëidic shubu dadpen

icquid Daudiseya caid yacnocquidon. Aitedishun iste dada uashun buame —quequin comapenec onquequin chuiposhi.

¹²Comapenec onquesho tantiatanec bidadquin isquien tabote manitsinaid 7tedi icposh. Shocosh piu nacnenaquidquo neposh. ¹³Aid nënantanquo Esusquio icposh. Con matses isadaidbo chuquid dapabimboec dasiuidaccosh. Dashcute ënapen icquid abitiombi datonquiaccosh. Abi shictonquete bëshpiu-bëshpiuctsëcquid nuacquid dapambo icposh.

¹⁴—Icsaisambo nec —camenuc aton mapi aton manëdaidbëdi abu ushubimboec ushumboshë icposh. —Matsesën naidtedi tantiaquidquo nec —camenuc cuëte isquidbimboec aton ëshë isquid-isquidquo icposh. ¹⁵—Utsin: “Ëmbiquen abitedi namenu,” catiapimbo icnuc abitedimbo namequid nec —camenuc shocosh piu nacnenaibimboec nac-nacquio aton taë icposh. —Nuquin Papapadquidquo nec —camenuc acte chododoquiacbimboec comapenec onqueposh. ¹⁶Abiucshun uispa 7tedi sanamposh. Chështe cuënumbo icquid ana shëcuënuësh cueshqueposh. —Matses icsaid cuidquidquo nec —camenuc adposh. Aton bëtantete ushëbimboec bëchamauanquiecposh. —Bëdambo icquidquo nec —camenuc ad icposh.

¹⁷Dacuëdampamboecsho istanequini Esusën dayumbi uebudpaccoc unësaniacimboec padishec. Adshobini Esusën camishquin bëdameposh.

—Dacuëdenda. Nuquin Papapadquidquo nebi. Nidaid uabi yec ictenedi nëbi adquid yec nibëdantiapimbo icquidquo nebi. Adquid yec abitedishun Icbombo nebi.

¹⁸Adquid yequi matsesën unës uaid yec uincuenash padpidec unëstiapimbo

icquid nebi. Adquid icquin ëbi tantiaquido unësacsho uincuemeshun Con Pa yacno ëbëdi tabadmendambi. Ëbi tantiesaboembi icsaido cuidacno nidmendac —queposh Esus.

¹⁹Adashic abi onquec: —Naden chuiquin dada uata. “Nëbi nadquid iquec. Nadquid utsi iquendac. Utsin nadotsiandac,” quequin ëmbi chuiboedbëdta ëmbi ismeboedtsen chuiquin dada uabanta. ²⁰Tantia. Ëmbi uispa 7tedi icquid abiucshun sanamboed mibi chuinu. “Nidaid Asia caid yacno 7ted shubu dadpen icquid yacno-yacnomboec ëbi tantiec iccuededquido chuibanquido 7tedbidi icoaic,” quequin tantiaquin uispa 7tedi ismec nebi. “Ëmbi namiaido nec,” quequin uispa sananquin ismec nebi. “Ëbi chuibanquidën chuibansho tantiec iccuededquidobëd iquebi,” quequin tantiaquin tabote manitsinaid 7tedi tabëcacno aid nënantanquio ëbibi iquebi —quequin aden ismeposhi Esusën.

Epeso yacnocquido Esusën chiaid

2 ¹Aden Esusën uispa 7tedi sananquin ismioshi. Tabote 7tedbidi manitsinaid tabëcacno aid nënantanquio abibi icquin ismioshi. —Ëbi tantiaquido chuibanquidën Icbo yec ëbi tantiaquidobëd iquebi —quequin aden ismeposhi. Adshumbic naden chuiposhi. —Epeso yacnocquidon ëbi tantiaquidon iste ëmbi naden chuiboed dada uata. “Tantia, Espeso yacnocquido. Mibitedi chuinu. ²Mimbi naidtedi tantiaquid nebi. Dayacquio icquin ëmbi chiapadomboen mimbi dadpen nabanoc. Utsibo chieshtonobi chieshtoenquio icquin mimbi ëbi tantioc. Ëbi tantiaquido icsamenuen chiec: ‘Esusën namiaidquio yec mibi chuinuec chopobi,’ quequin muaquidon

chuisho: ‘Mua. Nuquin Papan chiaidpenquio mimbi chuibanoque. Utsibo chienda,’ quequin mimbi aidon chiaid tantienquio iccoc. Aden mimbi bëdamboen naoc. ³Adembidi utsibon chieshënaqui chieshtoenquio icquin Nuquin Papan chiaidbëdta ëmbi naid mimbi chuibanoc.

⁴Aden bëdamboen nasho isun mibi icsaid abentsëc chuitsëcnu. Tauamboen mimbi ëbi tantiaquiopadenec. Aden ëbi tantiaquidquio icquin mimbi utsibotsen tantiaquiopadenec. Adodenedëmbi pacuënëdacimboen ëbi bëdiactsëc tantiatsëcquin utsibotsen mimbi bëdiactsëcbidi tantiatsec. Adec mibi icsacuededec. ⁵Ëmbi chuiboed tantiash: ‘Ai, abimbo caic. Tauamboen Esus tantiaquiondaidi nëbimbi bëdiactsëc tantiachitec. Adchitequini icsaoc,’ qeshun tauamboen mimbi naondacpadomboen ëbi tantiaquiota. Adembidi utsibotsen tantiaquiota. Adoenquio icshoembi mibi yacnoshon ëmbi chiaid mibi chuibanquid nibëdmendac. Adnuc ëbi tantiec cuëdënuec mibi pudued-puduedenquio ictsianac. ⁶Mibi icsaid ënquin chiombi. Nëbi mimbi naid utsitsen isash bëdambo iccobi. Mibi cuëdënacno puduedshun nicodaitabon mibi icsamenuen icsamboen chuisho tantiashun: ‘Aido icsamboshë iquec,’ mimbi caoc. Adembidi aido bëdamboen istiapimbo icoaibi. ⁷Nëbi ëbi tantiaquido utsibo chuinu. Ëmbi Espeso yacnocquido chuibocpadomboen con Mayanën mibitsen tantiametsiashe. Pabiate cuembo icquin ëmbi chiaid tantiata. Satanasën: ‘Icsamenu,’ caqui chieshtoenquio icquin ëbi tantiasho Nuquin Papa yacno ëbëdi tabadmendambi. Tauamboen matses uashun Nuquin Papan aid dada tsadacno tied bëdamboshë yacno tied

nënantan icquid cuête matses
unëstiapimbo icquid icmete
icmepampic. Aid cuête bacuë
meniacbimboecnuc mibi padpidec
unësenquoio icnuc ëbëdi
tabadmendambi,” quequin ëmbi
chuiboed dada uata —quequin Esusën
chuiposhi.

Esmidina yacnocquido Esusën chiaid

⁸Adshumbic Esusën padpiden
chuioposhi. Aid nidaid uabi yec
icpampidi nëbi adquid yec
nibëdantiapimbo icquid nec. Adquid yec
abitedishun Icbombo icshobi
chieshëmënnquidon unës uacsho
chococaqui uincuempaccondash.
Adondaid yec unësaid
uincuemequidquido nec. Aidën naden
chuiposhi. —Esmidina yacnocquidon
ëbi tantiaquidon iste ëmbi naden
chuiboed dada uata. “Tantia, Esmidina
yacnocquido. Mibitedi chuinu. ⁹Ëbi
tantiaquido icsho utsibon chieshënac
mimbi dayun uaid nibëdquiendac. Nëbi
mitsana nibëdquid yequi con Pa
yacnuësh dadpen dayun uaquidbimboec
mibi bëdamboshë iquendac.
Chieshëmënnquidon mibi icsamboen
chuishumboedtsen tantiembi. Mibi
yacnoshon Satanasën namiac:
'Isadaidbo nebi,' quequidon mibi
icsamboen chuishunosh. Nuquin Papan
con matses caido yequi Nuquin Papan
yuapenquoio yec Satanasën yuaboen nec.
¹⁰Aido tantiash: 'Ashibi mëyampatsiash,'
quec dacuëdenda. Satanasën: '¿Ada Esus
tantiaquido chieshtoenuquoio ictsiashe?
Tanu,' quequin namiacpadomboen
chieshëmënnquidon mibi utsi-utsien
quënën nauedbanendac. Adoac
daëdpactsëc ushec mibi mëyadendac.
Puduenabi yec chieshtoenda.
Chieshëmënnquidon: 'Esus tantiaquido
icsho mibi cuesunenu,' caqui

chieshtoenda. Aidon cuesuniacsho mibi
Nuquin Papa yacno puduedmeshun
ëbëdi tabadmendambi. ¹¹Nëbi ëbi
tantiaquido utsibotsen chuinu. Ëmbi
Esmidina yacnocquido
chuibocpadomboen con Mayanën
mibitsen tantiametsiashe. Pabiate
cuembo icquin ëmbi chiaid tantiata.
Chieshtoenuquoio icquin ëbi tantiasho
isun icsaido cuidquiacno nësecainquoio
iquendambi,” quequin ëmbi chuiboed
dada uata —quequin chuiposhi Esusën.

Pedcamo yacnocquido Esusën chiaid

¹²Adoshombic ana shëcuënuësh
chështe cuënumboshë icquid
cueshqueboedën Esusën naden
chuioposhi. —Pedcamo yacnocquidon
ëbi tantiaquidon iste ëmbi naden
chuiboed dada uata. “Tantia, Pedcamo
yacnocquido. Mibitedi chuinu. ¹³Mibi
yacno Satanasën yuabo dadpen icnuc
ëbi tantiec mibi chieshtoenuquoio iquec.
Ënden Satanasën namiac mibi
yacnoshon chieshëmënnquidon con yua
Antipas caid cuesunepondash. Aidën
chieshtoenuquoio icquin ëmbi naid
chuibansho cuesuniacsho isumbic
adembidi chieshtoenuquoio icquin mimbi
ëbi tantiaquiopondac. Aden mimbi
bëdamboen naid tantiembi.

¹⁴Adondaid tantiaquin mibi icsaidtsen
chuinu. Mibi cuëdëncuededacno Esus
tantiaquido icsamequid utsi-utsiec
puduedposh. Badan caidbimboecquido
aido nec. Ëndenquimboshë matses
utsibo chuiquid dapa Badac caidën:
'Isadaidbo aquec cho,' cac comapenen
tantiaquidën Badan caidën isadaidbo
Nuquin Papan chiaid niacmenuequin
chuitampampic. Aidën chiapadomboen
Badac caidën matses chidobon
isadaidbo dada dadpen
chudmebededpampic. Adshumbic ambi
papa caid Nuquin Papapenquoio

tantiamenuen ambi papa quequin dasamboed nëish pichicaid pebededacno buampampic. Aden Nuquin Papan chiaid niac-niacmec icsamianquido mibëd iquec. Aido cuemepatecnëdan mimbi. ¹⁵Adec nicadaitabo caido ëbi tantiate shubun puduedash mibëdi cuëdëncuededec icsamiente bumpec. ¹⁶Aidon chiaid mibi niac-niacmenushe. Aidobëd tabadenda. Mibi cuëdëncuededacno chomenda. Ëmbi chuiboed niacbidansho isun con ana shëcuënuësh cueshqueboedën chështen cuesacimboen mibi cuidtsiambique. ¹⁷Nëbi ëbi tantiaquido utsibotsen chuinu. Ëmbi Pedcamo yacnocquido chuibocpadomboembidi con Mayanën mibitsen tantiametsiashe. Pabiate cuembo icquin ëmbi chuiboed tantiata. Chieshtoenquo icquin ëbi tantiasho bëdambo icmendambi. Nuquin Papan isadaidbo mana caid pemedenequin dayun uacpadomboen mibi bëdamboen tabadmendambi. Adshumbic: 'Ëmbi tantiaidquio yec ëbi yacno puduedtequid nec,' qeshun cuënote ushu menendambi. Abi cuëmëdquid icnubi utsi uain cuëinquin aid cuënoten dada uatanquin menendambi. 'Ëmbi meneboedënuidsëqui ma isnu,' quequin adoendambi," quequin ëmbi Pedcamo yacnocquido chuiboed dada uata —quequin chuiposhi Esusën.

Tiatida yacnocquido Esusën chiaid

¹⁸Adoshombic aidëmbidi padpiden chuioaposhi. Cuëte isquidbimboec aton ëshë isquid-isquidquio yequi aton taë shocosh piubimboec nac-nacpambo icposh. —Icsaisambo yec Nuquin Papan Madombo nec. Adquid yec abitedishun naid tantiaquidquio icquin matses cuidquidquio nec —camenuec adquio

isadquidën naden chuiposhi. —Tiatida yacnocquidon ëbi tantiaquidon iste ëmbi naden chuiboed dada uata. ¹⁹"Tantia, Tiatida yacnocquido. Mibitedi chuinu. Mimbi naid abitedi tantiambi. Ëbi tantiaquin mimbi utsibotsen bëdamboen tantiec. 'Aton Papabëdtan Esusën bëdamboenshë natsiash,' quequin chieshtoenquo icquin mimbi ëbi tantiec. Adquid icquin ëbi tantiamenuen utsibo nashunquido mibi nec. Ëbi tantiesabon: 'Padi. Esus tantienda,' caqui mimbi chieshtoenquo icquin ëbi tantiapec. Tauamboen ëbi tantiaquin daëdpactsëc naondaidi nëbi ëbi tantiaquioshon ëmbi chiacpadomboen mimbi dadpen naic.

²⁰Adec utsi-utsiec bëdambo icnubi icsamianquid chido abi iquec. Aid mimbi cuemepatecnëdan. Aid cuemenquo yec mibitedi icsaic. Mimbi cacumiabi mibi iccuededacno isadaidbo tsusedpan chido Esabed caidbimboecquid chido icsamboshë icquid manuec puduedposh. Puduedshumbic: 'Nuquin Papan chiaid chuiquid nebique. Tantia. Chuinu,' quequin abi bunaiduidquio chuibanosh. Adoac ëbi bëdiactsëc tantiauidtsëcboedi aidën chiacpadec icsacuededposh. Nuquin Papapenquo utsibon papa caid tantiabededacno puduedposh. Adshumbic aidon papa quequin dasamboed nëish pichicaid pec tabadcuuedequimbi aton chidopenquo chudbededposh. ²¹Adsho isun aid chido: 'Ma abi icsaid ënu,' qeshun badedquio cuidenquo iccombi. Adoboqui abi icsaid ënte bunenquo iccosh. ²²Adec abi icsaid ëntiapimbo icsho isumbimbi nëbi cuidendac. Ëmbi nac daicsabudash mëyadquiec aton ueten uendac. Ambi chiacpadomboen naquido adembidi mëyadquionoc cuidendambi. Aidon ambi naid ënshoembi cuidenquo

ictsiac. ²³Aid chido cuidquiquimbi aton bacuëbobimboecquido aidën chiacpadomboen naquin ëntiapimbo icquido adembidi cuidquiendambi. Ëmbi adosho isun ëbi tantiaquidtedishun: ‘Matsesën otacquo tantiaid tantiaquidquido Esus nec. Adquid icquin abi icsaid ënenquio icquido cuidquin abi tantiaquido bëdambo icmendac,’ quequin tantiatsiash.

²⁴Tantia. Ambocquido ëbi tantiaquidombotsen chuinu. Aden Satanasën chuimiadën chuisho: ‘Aden chuisho tantiatiapimbo iquebi,’ mimbi capoc. Aden bëdamboen nasho isun utsi chienquio iquembi. ²⁵Nëiduidtsëqui chuinu. Mimbi bëdamboen nabocpadomboen chieshtoenquio icquin ëbi tantiata. Ëbi choabi yacpadembi adota. ²⁶Choshombimbi chieshtoenquio icquin ëmbi chiacpadomboen naquidombo ëbëdtan chuiquid dapabo icmendac. Adoac ëbëdtan matses utsibo abitedi namendac. ²⁷Aden Nuquin Papan aido ëbëdta chuiquid dapa icmiacsho utsibon: ‘Dëniacquin ëmbiquen nanu,’ catiapimbo iquendac. Ëbi chieshëinquido: ‘Esus dëniacquin ëmbiquen matses namenu,’ qesho tantiashun matsu nacenquidën ambi nacenaid icsambo icsho isun pos-posacbimboen cuidquiendambi. ²⁸Badiadte anoentsëc uispa dapa choded-chodedbocpadquiec ënëdenquio yec ëbi tantiaquidobëd iquendabi. ²⁹Ëbi tantiaquido utsibotsen chuinu. Ëmbi Tiatida yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin tantiata. Chieshtoenquio icquin ëbi tantiasho adembidi bëdambo icmendambi,” quequin ëmbi chuiboed dada uata —quequin chuiposhi Esusën.

Sadis yacnocquido Esusën chiaid

3 ¹Adoshombic Nuquin Papan Mayan abi tantiaquidobëd tabadmequidquido icquin Esusën padpiden chuiposhi. —Abi tantiaquido chuibanquid namequid nec —camenuen uispa 7tedi sananquin ismeboedën naden chuiposhi. —Sadis yacnocquidon ëbi tantiaquidon iste ëmbi naden chuiboed dada uata. “Tantia, Sadis yacnocquido. Mibitedi chuinu. Mimbi naidtedi tantiembi. Bëdamboec tabadquido danquin utsibon: ‘Bëdambo icquido nec,’ mibi canubi ëmbien adotiapimbo iquec. Mibi bëdapenquio iquec. Unësacbimboen mimbi ëbi bëdamboen tantienquio iquec. ²Isucunacbimboen ëbi padpiden tantiaquiota. Nuquin Papan chiacpadomboen mimbi nauidtsëccoque. Mimbi ëbi tantienquio iqueque. ‘Nuquin Papan chiacpadquiec bëdamboec tabadnuna. Esus tantiaquionona,’ cananta. ³Mimbi ëbi tantiabenondacpadomboen ëbi tantiaquiota. Bëpiscudenda. Nëbi mibi icsaid ënshun ëmbi chiacpadomboen naoata. Isucunenquio yacbimboen ëbi tantienquio icshoembi mibi cuidendac. ‘Ampequid choec,’ quequin tantienquio yacbimboen ëmbi cuidte tantienquio icsho mibi cuidtsiambique. Ëbi tantiaquiota.

⁴Mibi yacno icsaquido dadpen tabadnubi utsi-utsiec daëdpactsëc ambi naid icsa ucudacbimboec icsainquio yec bëdamboec tabadec. Adece bëchish ucudacbimboec abi icsaid ënash bëdamboec tabadsho isun ëbëdi tabadmequin icsaisa icmendambi. ⁵Ëbi tantiaquido utsibotsen chuinu. Ëmbi chuibocpadquidën chieshtoenquio icquin ëbi tantiasho adembidi bëdamboen isun Nuquin Papa yacno

ëbëdi tabadmequin icsaisa icmendambi. Aido cuëmëdquid cuëmëdquidquien Nuquin Papa chuibanendambi. ‘Aido ëbi tantiaquidotedi neque. Nuquibëd tabadmenuna,’ quequin adoendambi Nuquin Papan abi yacnoshon uaido mayan bëdabontsen tantianuc. Aden dada uaid ucudenquio yac bimboen bëshunenquio icquin ëbëdi tabatquido abitedi tantiemi. ⁶Ëmbi Sadis yacnoccuido chuiboed Nuquin Papan Mayanën mibitsen tantiametsiashe. Pabiate cuembo icquin bëdamboen tantiata. Chieshtoenquio icquin ëbi tantiasho adembidi bëdambo icmendambi,” quequin ëmbi chuiboed dada uata —quequin Esusën chuiposhi.

Pidadepia yacnoccuido Esusën chiaid

⁷Adoshombic icsaisambo icquin ambi chiacpadomboen naquidënquio Esusën padpiden chuiposhi. Con tsusedpa Dabid yampicpadquid matses namequidquio yec ambentsëqui Nuquin Papa yacno puduedmequid nec utsibon: —Padi —catiapimbo icnuc. Abi tantiesabo cacumequid Esus nec. Aidën naden chuiposhi. —Pidadepia yacnoccuidon ëbi tantiaquidon iste ëmbi naden chuiboed dada uata. ⁸“Tantia, Pidadepia yacnoccuido. Mibitedi chuinu. Mimbi naid tantiemi. Mibi yacno ëbi tantiaquido daëdpactsëc iquec. Adquid yec: ‘¿Ada nuquitedictsëqui chieshtoenquio icpatsiaba?’ queded-quededtsëcquien mimbi ëbi tantiaquioc. Chieshënaqui: ‘Esus tantiatiapimbo iquebi,’ quenquio mibi iccoci. Adec chieshtoenquio icsho isun ëmbi namiac ëmbi naid mimbi chuiban-chuibanendac utsibon ëmetiapimbo icquin. ⁹Aden isadaidbon mibi ëmetiadquio iquec. Aido: ‘Con matses isadaidboudtsëqui Nuquin

Papan bëdamboen isendac,’ quec muaboedo Satanasën yuabo niosh. Ëmbimbo namiac mibi yacno cho-chosho mimbi chuibanendac. Adoac: ‘Ai, abimboen mimbi caoc. Nuquin Papan Madon Esusën tantiaidombo mibi nec,’ aidon mibi caindac. ¹⁰Ëmbi chiacpadec chieshtoenquio icquin ëbi tantiasho isash mibi cudasendabi. ‘¿Ada Esus tantienquio yantsiashe? Tanu,’ qeshun nidaid utsi-utsiec yacno tabatquido abitedi Satanasën natiambo icmendac. Adosho mibi chieshtoenquio icquid icmendambi.

¹¹Tantia. Nëbi choendabi. Utsibon chieshënaqui mibi icbocpadquiec chieshtoenquio yec bëdamboec tabadta. ‘Ëbi adenquio icsho isun Esusën abi yacno puduedmenquio ictsiashe,’ quiash bëdamboec tabadta. ¹²Aden chieshtoenquio icquin ëbi tantiaquido utsibo abitedi Nuquin Papa yacno yuedendambi. Buintad nitsinaid chiquidiapimbo yac bimboecnuc con shubun icquido mibi icmendambi auëshquio cuentiapimbo icnuc. ¿Mitsipaden icbon: ‘Con na nec,’ quequin abi cuëmëdquid dada uaquin ismepec? Adembidi abitedi ismequin: ‘Con Pabëdtan con matses nec,’ mibi caindami. ‘Nuquin Papa yacno ëbi tabadaid Edusaden chuca caid abucuësh budtequid yacno tabatquidomdo nec,’ mibi caindami. Nuquin Papan abitedishun Icbombo icmiac ëbëdtambi chuquid mibi icmendambi. ¹³Ëmbi Pidadepia yacnoccuido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bëdamboen tantiata. Chieshtoenquio icquin ëbi tantiasho adembidi bëdambo icmendambi,” quequin ëmbi

chuiboed dada uata —quequin Esusën chuiposhi.

Daudiseya yacnocquido Esusën chiaid

¹⁴Adoshombic abitedishun naid tantiaquin abimbo chuiquidënquo Esusën padpiden chuioposhi. Nidaidbëdta abitedi uaquidënquo abitedishun Icbon chuiposhi naden. —Daudiseya yacnocquidon ëbi tantiaquidon iste naden ëmbi chuiboed dada uata. “Tantia, Daudiseya yacnocquido. Mibitedi chuinu. ¹⁵Mimbi naid tantiambi. Chieshtoenquo icquin ëbi tantiaquid ictiadquidi adquidpenquo mibi nec. ¿Ëbi bëdamboen tantiaquidon adopendactic? Padenquo. ‘Esus tantiaquid nebi,’ quiondaidëmbi mimbi naiduidi naquin mimbi ëbi bëdiactsëc tantiatsëccoc. Adsho tantiashun: ‘Dayacquio yacbimboen ëbi tantiaquiopashun,’ caimbi mibi. ¹⁶Mibi adec chieshtonoc ëbitsen chieshtotiadquio iquebi. ‘Cacumiacbimboen Nuquin Papa yacno ëbëdi mibi tabadmenquo iquendambi,’ mibi catiadquio icchitebi. ¹⁷Nuquin Papan chiaid niac-niaquec icsapobi,’ quetiadquidi: ‘Ëmbembi con na dadpen bedshun dayun uaic utsi bunenquo yec bëdambo iquebi,’ mibi quepoc. ‘Esus tantienquo yec Nuquin Papabëd tabadtiapimbo icchitebi,’ quetiadquidi mibi adenquo iccoc. Nuquin Papa yacno tabadte tantienquo icscho isun mibi shubiuatiadquio iquebi. Bëchish ucabi yacbimboen mibi icsaid ënabi icscho mibi bëdamboen istiapimbo iquebi. Pacuënëdadbimboen ëbi tantienquo mimbi iquec. ¹⁸Adboedëmbi Nuquin Papabëd tabadte bunquin ëbi tantiaquiota. Ëbi tantiaquin bëchish ucacbimboen mibi icsaid ënta. Adsho icsaisabimboecnuc mibi bëdamboen isquin ëbëdi tabadtequid

icmetsiambique. Pacuënëdaid paposhquiabimboecnuc ëmbi naid mibi bëdamboen tantiametsiambique. Ëbi tantiata.

¹⁹Ëmbi tantiaido bëdamboen tantiamembi. Aton papan: ‘Padi, mibi icsambo iquec,’ quequin bacuë ëmiacbimboen ëbi tantiaquido icsasho isun ambi naid ëmenuequin natiambo icmendambi. Ëbi tantiaquin mimbi icsamboen naid ënash bëdamboec tabadta. ²⁰Mibi tantiaquiembrie. ‘Ëbi tantiata,’ ëmbi cac mibi: ‘Ai,’ quesho tantiash mibëd iquendabi. Pec tabadec bëisnanguiacbimboec mibëd iquendabi. ²¹Tantia. Ëbi tantiaquido utsibotsen chuinu. Chieshtoenquo icquin Nuquin Papan chiaidtedi naquin nainash aidbëdi tabadquid nebi. Adquid yec aidbëdi abitedishun Icbombo nebi. Adembidi ëmbi con Pan chiaid nacpadec chieshtoenquo yec ëbi tantiec tabadsho ëbëdi tabadmequin ëbëdtan chuiquid icmendambi. ²²Ëmbi Daudiseya yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bëdamboen tantiata. Chieshtoenquo icquin ëbi tantiasho adembidi bëdambo icmendambi,” quequin ëmbi chuiboed dada uata —quequin chuiposhi Esusën.

Nuquin Papa Uanën isaid

4 ¹Asia yacnocquido Esusën ëmbudquin chuibon abuc ispombi. Adshun isquien shëcuë shënciacbimboec isadpec. Adnubien chuibocpadquiec shoncacbimboec comapenec onqueoaposh. —Nëmbo cho. “Nadquid iquendac. Nadotsiandac,” quequin mibi dadpen ismenu —caposhi.

²Adoac Nuquin Papan Mayanën tantiamiac ambo nidacbimboen ispombi. Ushquin isacbimboembimbi

caindac. Adshun isquien Nuquin
 Papambo chuiquid dapan tsadte
 dapanquo tsadpec. ³—Chuiquid dapa
 abentsëcquiobi nec. Bëdamboshë iquec
 —camenuc matses bunaidquo
 casëdubimboec nac-nacquio yec piumbo
 yec bëdamboshë isadposh. Abi tsadaid
 nënantanquo uenquebudpamboec uen
 podquedbipamboec umu-umupambo
 icposh. —Bëdamboshë icquidquo nec
 —camenuc adquo icposh. ⁴Nuquin
 Papa nënantan icnuc abi dacuenadec
 matses tsusiobo Esus tantiaquido
 chuiquid 24tedi icquido tabadposh.
 Chuiquid tsadte utsi 24tedi tsadte icnuc
 icbo-icboec aid tsadten
 tabadcuededposh. Abëdi tabadmequin
 Nuquin Papan icsaisa icmiaido yec
 ushumboshë icquidquo
 dasiuidcuededposh. Chuiquid dapan
 mauetembo shocosh nacnenaidquo
 maecuededposh. ⁵Adnubien Nuquin
 Papa yacnuësh abubimboec
 bed-bedquetanenubien abu
 tesquianiacbimboec cuëdtoposh.
 —Abitedishun Icbombo nec
 —camenuc adec cuëdposh. Nuquin
 Papan bëntiaucquo tabote taboaid
 7tedi icnuc tabëcaid icposh. —Aton
 Mayan abentsëcshun Nuquin Papa
 bëisquioquimbi abi tantiaquido
 chianequid yequi Esus
 tantiaquidobëdtsen icoaic —camenuc
 aden ismeposhi. ⁶Bëntiaucbidi
 actepenquo chian dapa
 acte-actetsëcquio isadposh.

Nuquin Papa tsadaid anoen
 daëdtsëcquio abi dacuenadec aben
 icquidbimboecquid 4tedi icposh.
 Dadano chedobi ëshë ictsëcquieci icposh.
 Utsi tanenquo. Abimboudquio
 istequidquo icposh. Cachoc icnubi
 tacbiduc adquiobidi icposh. ⁷Abentsëc
 bëdi dapambo tëbucboquidbimboec
 icposh. Utsibic baca bënëbimboec

isadposh. Utsibic matsesën
 bëtantetebimboec bëisadposh. Utsibic
 chiqui dapabimboec isadposh.

⁸Icho-icboec aton podo uicchunën
 podobimboec 6tedi icposh. Podonotsen
 adquiobidi ëshëuidquo isadposh. Podo
 ananquo adquiobidi icposh.
 Aidonquiobi ënenquo icquin Nuquin
 Papa chuiposh nadec cuëdënquin.

—Icsaisambo yec bëdamboshë
 icquidquo mibi nec.

Abitedishun Icbombo mibi icnuc
 mibipadquid utsi nibëdec.

Abitedimbo tantiaquidquo mibi
 icnuc mimbi tantiacmaid
 nibëdec.

Matses uabi yec icpampidi mibi nec.

Nëbi adquid yec mibi

nibëdantiapimbo icquidquo nec

—quec badiadquidën

badiadquidënquieci cuëdënashic
 inchëshëntsen cuëdëdeneposh.

⁹Aden dadanobi ëshëcquidon:

—Mimbi nac bëdambo iquebi. Mibi

bëdamboshë iquec, Papa. Abitedishun

adembidi: “Bëdambo iquec,” mibi cac
 bëdambo ictsias, Papa —Nuquin Papa

cadonenubi ¹⁰tsusiobo 24ted icquido
 ambo tabadquido danëshën

tinquebudcuededposh. Adtanquimbi

mauete chicbededtanquin Nuquin

Papan tayun sambededposh:

—Abitedishun Icbombo mibiuidtsëqui

nec —quequin. Adotanquimbic

aidontsen Nuquin Papa chuiposh nadec
 cuëdënquin.

¹¹—Mibi bëdamboshë iquec, Papa.

Adembidi abitedishun mibi:

“Bëdambo iquec,” capashun.

Abitedishun Icbombo mibiuidtsëqui
 nec.

Chuiquid dapambo abentsëcquiobi
 mibi nec.

Mibipadquid utsi nibëdec.

Nadatiambo icquidquo mibi nec.

Comapenen tantiaquidquo icquin
mimbi abitedimbo uapampic.

Mimbi tantiacpadomboen
mimbiuidtsëcquiobi abitedi
uapampic.

Adoac mimbi tantiacpadequi mimbi
uaido nibëdanabi yec abi iquec.
—quec tsusiobo cuëdëncuededposh.

Nuquin Papan chiacpadomboen namequid Esus isadaid

5 ¹Adshun isquien Nuquin Papan
abiucshun ambi chiaid dada uaid
sanampec. Abiuc daëdi dada uaid
bidicabanquin: —Istemaïdën isnushe
—qeshun 7ted icnuc bitaccatempin
bitaccabanaid neposh. ²Adnubien
Nuquin Papan abi yacnoshon uaid
mayan bëda chuiquid dapa comapenec
onqueposh. —¿Tsuntsin nëid dada uaid
bedshun bitaccaid chicbanquin
chuiabampatsiash? —quedo-quedoposh.
—¿Tsuntsin Nuquin Papan chiaid
bedshun isquin ambi chiacpadomboen
naquin naimepatsiashba? —quequin
tantic adposh. ³Adoquien
ëchedanenquo icposh abitedimbo.
Nëidic Nuquin Papabëd tabadquidotedi.
Nëidic nidaidën tabadquidotedi. Nëidic
unësaidotedi. Aidtedi dada uaid
bedshun bitaccaid chicbanquin istequid
nibëdposh. ⁴Adsho isashini unësquo
icnuc shubipoc: —Aid dada uaid
bedshun chicbanquin chuiabanquid
nibëdec —quiash. ⁵Adshobini anocquid
tsusion: —Otac. Shubienda. Ënëd. Is.
Dada uaid bedshun chicbanquin
chuiabanquid abi iqueque. Nuquin Papan
matsesmequin chomiondaïdquo neque.
Aton tsusedpa Uda yampid icnuc aton
tsusedpa utsi Dabidbimboecquid
chuiquid dapambo nec. Utsibon
dëniacadiapimbo icquid nec. Aidëmbi
chieshtoenquo icquin Nuquin Papan
chiacpadomboenuidi naquidquidquo icquin

aid dada uaid bedshun namendac
—caposhi.

⁶Adoac isquien isadaïdbon Nuquin
Papa cuidmenquo icnuen abided unës
uaid obeca bacuëbimboecquid Nuquin
Papabëd abi tsadacnombo isadtsec.
—Matses icsaid bedshunuec abided
cuidadec unësaid Esusquo nec
—camenuc adec isadposh. Utsibo
dacuenadec tabadnuc nënantanquo
Nuquin Papabëdquo icposh.
Anoentsëqui dadanobi ëshëcquido
dacuenadec tabadnuc abi uquëtsëc
tsusiobouidquo dacuenadec tabadposh.
Padnuc obecabimboecquid yec aton pais
7tedi icnuc aton ëshëmbo
aidtedquiobidi icposh. —Abitedishun
Icbombo yec utsin dëniacadiapimbo
icquid Esusquo nec —camenuc aden
pais ismeposhi. Adembidi: —Aton
Mayambidi Nuquin Papan Mayan yec
nidaid utsi-utsiec yacno matses abitedi
yacno nidmiaïd icnuc
ompodëmëdtiapimbo icquid Esus nec
—camenuc ëshë 7tedi ismeposhi
ushquin isacbimboecnuc. ⁷Adshumbic
obecabimboec isadboedën Esusën
Nuquin Papan abiucshunquo sananaïd
dada uaid bedposh. ⁸Bedsho istanequien
dadanobi ëshëcquidobëd tsusiobo 24ted
icquido Esus ismec danëshën
tinquebudcuededposh. —Bëdamboshë
icquidquid mibi nec —quiash
adcuëdedposh. Tsusiobon icbo-icboen
ten-tencate sananquimbi utsiucshun
shocoshëmpi bëdambo nuadnuc
tauitempi sanamposh. —Ëmbi
ten-tencamequin Nuquin Papa
cuishoncamiacbimboec Esus tantiaquido
cuëdënaïd iquec —quequin aden
ten-tencate sananquin ismeposhi.
Adembidi: —Nëshun tauiaç nëid
pushudquid Nuquin Papa yacno
nidacbimboec Esus tantiaquidon
chianaïd iquec —quequin bëdambo

nuadnuc tauitempi sananquin
ismeposhi. ⁹Adashic cuëdënte chucan
Esus chiec cuëdëncuededposh tsusiobo.

—Mibi bëdamboshë iquec.

Nuquin Papan chiacpadec matses
cuidmenquo icnuec mibided
cuidadec unësondaidquo mibi
nec.

Nëbi icsambo icboedombi mibi
tantiasho Nuquin Papan
bëdamboen isendac.

Aden Nuquin Papan
chiacpadomboen naquidquo
mibiuidtsëqui nec.

Mimbiuidtsëqui Nuquin Papan
sanamboed dada uaid bedshun
bitaccaid chicbanquin isbanquin
Nuquin Papan chiac- padomboen
namendac.

Mibi tantiaquidotedi Nuquin Papan
bëdamboen isendac.

Nëidtedi matses caimbi. Nëidic
matsesquo.

Nëidic matses utsibo.

Nëidic nidaid utsi-utsiec yacno
tabadquido.

Aidtedi mibi tantiaquido yansho
Nuquin Papan bëdamboen
isendac.

¹⁰ Adoac min yuabo yanshun Nuquin
Papa yacno mibëdi tabadquin:
“Mibi bëdamboshë iquec,”
caded-cadedendac.

Mimbi tantiacpadën nidaidënuësh
mibëdtan chuiquid iquendac

—quec cuëdëncuededposh tsusiobo.

¹¹ Adnubien abi yacnoshon Nuquin
Papan uaido mayan bëdabotsen
cuëdëncuededposh dadpenquioshë.
10,000 X 10,000tedi udimbo dëniacash
cuëte podotedi tambantiapimbo
yactedimbo comapenec
cuëdëncuededposh. Nuquin Papa
Esusbëdi nënantanquo icnuc
anoentsëqui dadanobi

ëshëcquidoidquo dacuenadec
tabadposh. Abi uquëtsëc dacuenadec
tsusioboidquo tabadposh. Aid
uquëtsëc dacuenadequic mayan
bëdaboidquo tabadposh. ¹²Adec
tabadec mayan bëdabo abitedimbo
cuëdëncuededposh naden chiec.

—Isadaidbon obeca bacuëded
cuidacimboec matses icsaid
bedshunuec abided cuidadec Esus
unës- pondash.

Esusquo bëdamboshë icquidquo
nec.

Adquid icsho: “Abitedishun Icho
icquin Nuquin Papan
chiacpadomboen namequidquo
mibi nec,” abitedishun capashun.

Adembidi: “Mimbi uaido yec
mitsana abitedimbo nec.

Comapenen tantiaquid mibi icnuc
mimbi tantiacmaid utsi nibëdec,”
abitedishun capashun.

Adembidi: “Mibi bëdamboshë iquec.
Mibi tantiaquiembi,” abitedishun
capashun

—quec cuëdëncuededposh mayan
bëdabo Esus tantiec.

¹³ Adnubien Nuquin Papan uaido
abitedimbo cuëdëndocuededposh. Abi
yacnocquidotedi yec nidaidën icquidotedi
yec unësaid uincuemiaidotedi yec acten
icquidotedi yec quec cuëdëncuededposh
naden chiec.

—“Abitedishun Icbombo yec tsadte
dapan tsadquidquo Nuquin Papa
bëdamboshë iquec.

Obeca bacuëbimboecquid abided
cuidadec unësaid Esustsen
bëdamboshë iquec,” canuna,
ënenquo icquin.

“Abiuidtsëqui Nuquin Icho nec. Utsi
adquid ictiapimbo iquec.

Aidën nac nuqui bëdamboshë iquec.
Abipadquid utsi nibëdec,” canuna
ënenquo icquin

—quec cuëdëncuededposh abitedimbo.

¹⁴Adsho tantiash dadanobi

ëshëcquido: —Ai, abimbo caic

—quenubi tsusiobo 24ted icquido:

—Nuquin Icbo bëdamboshë iqueque.

Ismenu —quetanec Nuquin Papabëdta

Esus ismec danëshën

tinquebudcuededposh.

Bitaccaid chicaid chiaid

6 ¹Adnubien Esusën Nuquin Papan:

—Nadoendambi —quequin chiaid

dada uaid 7tedi bitaccaid tauamboen

abentsëc chicposh chicabi icquid 6tedi

icnuc. Aid chicnubien Nuquin Papabëd

icquid dadanobi ëshëcquidën

abentsëcshun abu cuëdacbimboec

comapenec cuëdquin: —Cho —caposh.

²Adoac cabayo ushumbo icquid

catsadec dada canti sanampamboec

chosho ispombi. Adec chosho isun:

—Mibi chieshëncquido uesquin cuesun

secaquidquio mibi nec —quetanquin

chuiquid dapan mauetembo

mauemeposh. Adoac adecbidi abi

chieshëncquido cuesun secanuec

nidposh.

³Adnubien Esusën dada uaid bitaccaid

utsi udictsëcquid chicposh chicabi

icquid 5tedi icnuc. Aid chicnubien

dadanobi ëshëcquid utsin: —Cho —cac

⁴cabayo piumbo icquid catsadec dada

choposh. —Matses cuesun

secananenquio icsho Nuquin Papan

tantiacpadomboen aidën nac matses

abitedimbo matses utsibobëd cuesun

secananendac —quesun chështe dapa

matses siante dapa meneposh.

Adomboen Nuquin Papan matses cuidte

tantiameposhi.

⁵Adnubien Esusën dada uaid bitaccaid

udictsëcquid chicposh chicabi icquid

4tedi icnuc. Aid chicnubien dadanobi

ëshëcquid utsintsen: —Cho —cac

cabayo chëshëmbo icquid catsadec dada

choposh. —Pete daëdpactsëc icmete

chiec —camenuen pete yuë tante

sanamposh. ⁶Adnubien dadanobi

ëshëcquido dacuenadec tabadnuc

nënantanshunquio Nuquin Papan

cabayo chëshëmbo icquid catsadquid

chuiposh. —Piucquid dadpenquio

meniac aton yuë daëdpactsëcnuc

tambanshun pete utsi-utsien

daëdpactsëc menianquid iquendac

—quequin pete utsi-utsiec nibëdte

chuiposh. Adshumbic: —Pete utsi-utsien

nibëdmetanquin tiedën icquid pete

utsi-utsien nibëdmenquio icquin nata

—quequin chuiposh. —Nuquin Papan

cuidac adec pete nibëdnuc matses pete

bunquiendac —quequin cuidte utsi aden

ismeposhi.

⁷Adnubien Esusën dada uaid bitaccaid

udictsëcquid chicposh chicabi icquid

3tedi icnuc. Aid chicnubien dadanobi

ëshëcquid utsintsen ënquimbi chuiquin:

—Cho —cac ⁸cabayo bëdiactsëc

ushu-ushupactsëcquid catsadec dada

choposh. —Aid matses unës uaquid nec

—quequin cuësho tantiombi.

Abipadquid utsin chinumposh.

—Aidombi Nuquin Papan

tantiacpadomboen matses cuidquin

matses dadpenquioshë unës

uabudnendac. Aidon namiac cuesun

secananec dadpen naimëdbudnendac.

Bunambi aidtedbidi unësbudnendac.

Daicsaidëmbic aidtedbidi. Aben icquid

uinsadpambo icquidën aidtedbidi

acshun secaindac —quequin Nuquin

Papan cuidte utsi ismeposhi.

⁹Adnubien Esusën dada uaid bitaccaid

utsi chicposh chicabi icquid 2tedtsëqui

icnuc. Aid chicnubien Nuquin Papa

yacno isombi. Abi tantiante nëish

pichicate dapa dayun chieshëncquidon

cuesun secaido Esus tantiaquido

tabadsho ispombi. Aido chieshtoenquio

icquin Nuquin Papan chiaidbëdta

Esusën naid chuibanec bëdamboec tabadsho aden cuesun secaido niosh.

¹⁰Adoaido icquin comapenec cuëdquin Nuquin Papa chuidoneposh.

—Abitedishun Icbombo icquin mimbi tantiacpadomboen namequidquo mibi nec. Icsaisambo yec muesambo mibi neque. En chui, Papa. Nidaidën tabadquido ëbi chieshënquin cuesun secaboedo ðtedectsicshun mimbi cuidpe? —caquin chuidoneposh.

¹¹Adoquien: —Chiata.

Yuec-yuecpactsëcshun naindambi. Min utsibobimboecquido ëbi tantiaquido utsibo ëmbi tantiactedi chieshëmënquidon ma cuesun secabono. Adoacsho isun cuesun secanquido cuidendambi —queposh. Adshumbic Nuquin Papan: —Ëbëdi tabadmequin icsaisa mibi icmembi —qeshun abitiombi dasiuidbudte ushumbo icquid dasiumbamposh.

¹²Adshumbic Esusën dada uaid bitaccaid utsi chicposh chicabi icquid abentsëc icnuc. Adnubien nidaid abichobi shëc-shëcquemboec comapenec uëdëqueposh. Nidaid uëdëquenubi abucuësh chënquequidtedi dacuëdampambo yamposh. Ushë dashcute chëshën bëpucacimboec inchëshquio icposh. Inchëshën ushëbic intacimboec piumboshë isadposh.

¹³Uispabic natiambo cunquenuc cuëte bacuë tididiquiacimboec nidaidën tididieposh. ¹⁴Abubic dashcute bidiquiacimboec isadposh. Macuësh dapabic abitedi manëdcuededposh. Acte nënantan nidaid icquidic abitedi manëdcuededposh. ¹⁵Adsho isashien Esus tantiesabo abitedimbo: —Ashibi cuidpec —quetanec ompodec cuemposh. Nëidic chuiquid dapabo dadpenquo. Nëidic aidobëdtan chuiquid utsibo. Nëidic sondado chuiquid dapabo. Nëidic aton na dadpen dayun uaquido. Nëidic

cuesambo icquido. Nëidic matses yuabo. Nëidic matsesën yuacmaido. Aidedi matses icsambo icquido abitedimbo sidquetanec ompodec cuemposh. Utsi-utsiec nidaid shëcuë dapan ompodnobi utsi-utsiec macuësh dapa yacno cuënote dapa dayun ompodposh. ¹⁶Ompoduidtsash: —Macuësh dapa cuitiadbudnec sebudnequin mabëspashuni. Nuquin Papan istuidshun cuidnushe —quenubien utsibo: —Cuënote dapa abucuësh paëdbudnequin ompopashuni. Nuquin Papan istuidshun cuidnushe. Adembidi abided ciudadec unësaid Esusëntsen cuidnushe. ¹⁷Aidon ambi tantiacpadënquibini nëimbobi cuidchitec. Padtembo. ¿Tsutsi cuidenquo icpatsiashba? —queposh. —Nadomboen Nuquin Papan abi tantiaquido cuesun secaquido cuidendac —quequin aden ismeposhi.

Isadaidbo Nuquin Papa tantiaquidombo bësiaid

7 ¹Aden Nuquin Papan cuidte ismëboshombic Nuquin Papa abi tantiaquido cudaste ismeposhi. Ismiac Nuquin Papan abi yacnoshon uaid mayan bëdabo 4tedi nidaid abichobi dacuenadec tabadsho isombi. Aidon cunquequid dapa 4tedbidi icbo-icboen uidën uaquin cuncamenquo icposh. —Nuquin Papa: “Ma cunquequidën icsa uabanu,” quibi icnuc abembi cunquequidën nidaid yec acte yec cuëte yec quenuc icsa uanushe —qeshun adoposh. ²Adnubien mayan bëda utsi ushë choacmiuësh choposh. Nuquin Papa abi tantiaquido cudasëmenuen dada uaquin bësete sanamposh. Aidën cunquequid uidën uaquido comapenec onquequin chuituidposh. ³—Chiata. “Nidaid yec acte yec cuëte yec quenuc icsa uanushe,” qeshun adembi cunquequid uidën uata.

Nuquin Papa tantiaquido bësebambono. Nuquin Papan matses neque. “Icsambo icquidobëdta cuidnushe,” qeshun bësebambono —quetanquin Nuquin Papa tantiaquido bësebamposh ushë choacmiuësh choquidën.

⁴Adshumbic ambi bësebamboed tambanquin chuibamposh. —Bëseboedtedi Acobo caidën madotedi 12ted icquidon matses tsyuecquido nec. Aidedi tambanac 144,000tedi icposh dadpenquioshë.

⁵Nëidic Acobo caidën mado Uda caidën matses tsyuecquido 12,000tedi. Nëidic Acobon madobidi Duben caidën matses tsyuecquido 12,000tedbidi. Nëidic Acobon madobidi Cad caidën matses tsyuecquido 12,000tedbidi. ⁶Nëidic Acobon madobidi Ased caidën matses tsyuecquido aidedquiobidi. Nëidic Acobon madobidi Netadi caidën matses tsyuecquido aidedquiobidi. Nëidic Acobon madobidi Manases caidën matses tsyuecquido aidedquiobidi. ⁷Nëidic Acobon madobidi Simeyon caidën matses tsyuecquido aidedquiobidi. Nëidic Acobon madobidi Debi caidën matses tsyuecquido aidedquiobidi. Nëidic Acobon madobidi Isacad caidën matses tsyuecquido aidedquiobidi. ⁸Nëidic Acobon madobidi Sabadon caidën matses tsyuecquido aidedquiobidi. Nëidic Acobon madobidi Ose caidën matses tsyuecquido aidedquiobidi. Nëidic Acobon madobidi Benamin caidën matses tsyuecquido 12,000tedbidi. Aid abitedi tsinacquin tanac 144,000tedi icposh —quequin chuiposhi mayan bëdan. Aden Nuquin Papabëdta Esus tantiaquido dadpenquioshë ismeposhi. —Adquido iquendac —quequin adoposhi.

Esus tantiaquido Nuquin Papa yacno tabadaid

⁹Aden Nuquin Papa tantiaquido bëseboedo 144,000tedi tambanquin

ismeboshombic padpiden Nuquin Papa yacnombo ismeposhi. Adoac isquien Esus tantiaquido dadpenquioshë tabadpec. Tambantiapimbo yactedi iquec. Nëidic nidaid utsi-utsiec yacno tabadquido. Nëidic matses utsibo. Nëidic matsesquio. Aidedi Esus tantiaquido neposh. Nuquin Papa Esusbëd tabadacnombo tabadposh. Abëdi tabadmequin Nuquin Papan icsaisa icmiaido yec ushumbo icquid dasiuidcuededposh. Con matsesën chuiquid dapa ismiacimboen: —Nuquin Papa bëdamboshë iqueque. Ismenu —quequin niste podobiecquid sananquin uic-uiccaposh. ¹⁰Aido comapenec cuëdëncuededposh.

—Abitedishun Icho icquin Nuquin Papan ambi tantiacpadomboen isadaidbon obeca bacuëded cuidacimboen aton Mado Esusded cuidpanëdash.

Adoac nuqui icsaid bedshunec abided ciudadec unëspondash Esus.

Aid tantiasho icsaido cuidacno nidmenquio icquin nuqui abëdi tabadmec.

Aton Papabëd bëdamboshë iquec —quec cuëdëncuededposh.

¹¹Adsho tantiash ambo tabadquido mayan bëdabotedi danëshën tinuebudcuededposh. —Nuquin Papabëd Esus abided cuidadaid bëdamboshë iqueque. Ismenuna —quiash adposh. Nënantanquio Nuquin Papabëd Esus tabadnuc abi uquëtsëc dacuenadec dadanobi ëshëcquido 4tedi icquiduidquio tabadposh. Abi uquëtsëc dacuenadec tsusiobo 24tedi icquiduidquio tabadnuc abi uquëtsëc dacuenadequic mayan bëdabouidquio tabadposh. ¹²Aid mayan bëdabotedi danëshën tinuebudcuededequi comapenec cuëdëncuededposh.

—Aden abi tantiaquido abëdi
 tabadmequid bëdamboshë iquec.
 Esusbëdi Nuquin Papa bëdamboshë
 iquec.
 Adembidi abitedishun: “Mibi
 bëdambo iquec, Papa,” quequin
 chuipashun.
 Esusbëdi Nuquin Papa bëdamboshë
 iquec.
 Abipadquid utsi nibëdec.
 Comapenen tantiaquidquio icnuc
 ambi tantiacmaid utsi nibëdec.
 Auididsëqui bëdamboen
 tantiaquidquio nec.
 Aidën nashunac bëdamboshë
 iquebi.
 Nadatiambo icquid nec. Abitedishun
 Icbombo nec.
 “Esusbëd Nuquin Papa bëdamboshë
 iquec,” canuna
 —quecuededposh mayan bëdabotedi.
¹³Adshumbic ëmbi 24ted icquid
 isboed abentsëcshun tsusion chuiposhi.
 —Ma ushumbo icquid abitiombi
 dasiuidquido ðtsutsi nepec?
 ðMitsiuëshquio aido chosh? —cac:
¹⁴—Tsaudi, tsusio. Mimbibien tantiec
 —capombi. Adsho tantiash: —Tantia.
 Mibi chuinu. Satanasën: “¿Ada
 chieshtoenquio ictisiashe? Tanu,”
 queshun natiamboshë icmiac Esus
 tantiec chieshtoenquio ictenedo nec.
 Adec chieshtoenquio icsho isun
 Satanasën tantiacpadomboen
 chieshëmënuquidon unës uapondash.
 Abided cuidadec unësaid Esus
 tantiaquido icsho icsaisa icmiaido yec
 dashcute ushumbo icquid
 dasiuidcuededposh. ¹⁵Esus tantiaquido
 icsho Nuquin Papan abi yacnombo
 puduedmeshun aton yuabo
 icmepondash. Adoac Nuquin Papa
 yacnombo tabadquimbi abi ënenquio
 icquin tantiendac. Adembidi Nuquin
 Papan: “Con mado mibi nec. Con

champi mibi nec. Nuquibi icnu. Cho,”
 queshun abëdi tabadmequin bëdamboen
 dayun uaic. ^{16,17}Isadaidbo matsesën
 nëish yua obeca dadpen dayun
 uacpaden abided cuidadec unësaidën
 Esusën abi tantiaquido bëdamboenshë
 dayun uaindac padpidec unëstiapimbo
 icnuc. Adoac pete bunenquio iquendac.
 Actetsen bundoenquio iquendac. Abi
 yacnuësh ushën pichiquenquio
 iquendac. Chun mëyadenquio iquendac.
 Nidaidënuësh shubidenedi Nuquin Papa
 yacnuësh shubitiapimbo iquendac.
 Natiamiante nibëdquiec iquendac.
 Unësquio icmiente nibëdquiec iquendac.
 Bacuë shubisho anin bëucquin bëdambo
 icmiacbmboen abi yacnoshon Nuquin
 Papan Esus tantiaquido
 bëdambouidquio icmendac —quequin
 chuibamposhi tsusion.

Dada uaid bitaccaid nainquin chicaid

8 ¹Nuquin Papa yacnoshon tsusion
 chuibombien obecabimboec
 isadquin Esusën nainquin dada uaid
 bitaccaid chicposh. Aden chicnubien
 Nuquin Papa yacnuësh nadimbo icposh.
 —Dacuëdampambo iquec —quec media
 oda yec yuec-yuecpactsëc otacquo
 tantiec tabadposh. ²Adnubien Nuquin
 Papan abi yacnoshon uaido mayan
 bëdabo sietetedi: —Nuquin Papan
 chiacpadomboen nanu —quec
 tabadposh. Adsho isun icbo-icboen
 shoncate sietetedi menebamposh.
³Adnubien mayan bëda utsi ambobidi
 choposh. Choash bëdambo nuadquid
 tauinuequin shocosh nacnenaid tauite
 dapa dayun nidtuidposh. Shocoshëmpin
 bëdamboshë nuadnuc tauitempi utsi
 sanamposh. Adsho isun bëdambo
 nuadquid nua meneposh. Adoac: —Nëid
 tauiac pushudquid Nuquin Papa yacno
 nidacbmboec Esus tantiaquidon
 chianiaid iquec —quequin bëdambo

nuadquid sanshun tauite nacnenaïd dapan tauiposh bêdambo nuadnuc.

⁴Aden tauiac Nuquin Papa yacnombo pushudquid nidosh. —Adembidi Esus tantiaquidon chianiaid abi yacnoshon tantiashun Nuquin Papan abi tantiaquido chieshênquido cuidendac —quequin aden ismeposhi. ⁵Adshumbic aid mayan bêdan tauite dapan samêdquid cuête dêtsisadaid isquidquio icquid bedshun shocoshêmpin sandoposh. Aden sandotanquimbic shocoshêmpichobi matses tabadacno masiabudposh. Nuquin Papa tabadacnoshon adoposh. Adnubien bed-bedquetanepamboec abu tesquianiabimboec cuêdtoposh. Adnubien nidaïd abichobi saca-sacaquemboec uêdêqueposh. —“Nuquin Papan êbi chieshênquido cuidpashun,” quequin Esus tantiaquidon chianesho tantiashun aden Nuquin Papan comapenen cuidendac —quequin aden ismeposhi.

Shoncate shoncaquin ismiaïd

⁶Matses tabadacno cuête dêtsisadaid isquidquio icquid masiabudnubien shoncate bedboedon mayan bêdabon shoncanuen sanamposh. ⁷Adshumbic abentsêcshumba shoncadoposh. Adnubien Nuquin Papan matses yacno uebimboecquid chomeposh. Nadquio icposh. Ue tsasi yec cuête dêtsisadaid isquidquio icquid yec intac yec quenuc chomeposh ue dapa choacximboecnuc. Aden chomiaïdên nidaïd nuamboshê tauïdposh. Cuête dadpenquioshê tauïdposh. Uasin dadpenquioshê pichiqueposh.

⁸Adnubien mayan bêda utsin shoncaposh 5tedishun shoncabi icnuc. Shoncanubien macuêsh dapatemi icquid nêdênquepamboec abucuêsh paêdec chian dapa mad caïd

nêpaêdposh. Adnuc chian nuamboshê intac yamposh. ⁹Adec intac yanaiðên acten icquid dadpenquioshê unêsbudneposh. Adecbidi cano dapa antabêdquidotedi abi canochobi mentoadbudneposh.

¹⁰Adnubien mayan bêda utsin shoncaposh 4tedishun shoncabi icnuc. Shoncanubien uispa dapabimboecquid abichobi tabotebimboec nêdên-nêdênquepamboec abucuêsh budec acte nêpaêdposh. Aid acte nêpaêdboedên acte utsi-utsiec dadpenquioshê actiapimbo yamposh. ¹¹Aid uispa acte muca uaquid niosh. Aid nêpaêdquin muca uaid acte acash matses dadpenquioshê unêsbudneposh.

¹²Adnubien mayan bêda utsin shoncaposh 3tedshun shoncabi icnuc. Shoncanubien Nuquin Papan namiac chênquequidtedi icsa uaposh. Ushê cuesquinc inchêshên ushê cuesquinc uispa dadpenquioshê cuesquinc caquin icsa uaposh. Adoaquien bêdambo chênqueboedi bêdiactsêcquio chênquiantsêccosh.

¹³—Aden Nuquin Papan matses cuidquiendac —quequin êbi ismenubien chiqui dapa cuenequi matsesximboec cuêdec comapenec cuêdcuemposh. —Esus tantiesabo Nuquin Papan cuidtequido tantiac unêsquioshê iquec. Shoncabi icboedon mayan bêda utsin 3tedshun shoncabanuc Nuquin Papan icsaïdo cuidte abentsê chotsecnuc ismendac. Aid cuidte dacuêdampamboshê iquendac —quec cuêdcuemposh abuc cuenequi.

Mayan bêda utsin shoncanuc isaïd

9 ¹Adnubien chiqui dapan chiacpadomboen mayan bêda utsin shoncaposh daêdshun shoncabi icnuc. Shoncanubien Nuquin Papa yacnuêsh mayan bêda badequio budash matses

yacno choposh. Adsho isun Nuquin Papan chiacpadomboen bêtashte chictempi meneposh. Podobitsi icsabo uidën uacno nidaid shëcuë uquëducquio icquid bêtashte chichte neposh. ²Aid chictempin chicaquien uquëducuësh tied nêdênquedoacbipamboec pushudtoposh. Abuc inchëshquio pushudquid icnuc ushë isadenquio icposh. ³Adsho isaquien pushudacnuëshquio tsectsecbiecquid dadpenquioshë cho-choposh. Chichumbimboec sianquidquio niosh. ⁴Adsho isun aido chuiposh. Aton petembo caic: —Nuquin Papan tantiacpadomboen tiedën caniquidbêdta cuëte podo penda. Uasintsen penda. Adembiidi Nuquin Papan cudasquin bêsemiaido abi tantiaquido sebudnenda. Aido senquio icquin Esus tantiesabo bêsiaidabi icquiduidquio sebudneta —quequin chuiposh. ⁵Adshumbic: —Unësnuc seshun secainda. Inchëshën ushë 5tedi nidmequin chichunën siacbimboecnuc sebudneta —cac tsectsecbiecquidën sebudnequin ismeposhi. ⁶Aid tsectsecbiecquidën siac natiamboshë yec matses unêste bunquiendac. Unêste bunquidi badedi unêsenquio iquendac.

⁷Aden tsectsecbiecquid ismeposhi. ¿Mitsipadquio nidaid cudasquid sondado catsadaid cabayo icpec? Adquio cabayobimboec tsectsecbiecquid isadposh. Shocosh mauetebimboecquid mauecuededposh. Matsesën bêtantetembobi bêsadposh. ⁸Chidon rêbushumbimboec isadposh. Bêdin shêtabimboec aton shêta icposh. ⁹Bêntsiauc shicdiadquid cudaste shocosh nacnenaibimboec sictsasimbo icposh. Aid abi maisi cuensho tantiac tied nêdênquiacbimboec comapenec cuêdposh. ¹⁰Aid tsectsecbiecquid chishpichquid yec chichumbimboec

sianquidquio neposh. Inchëshën ushë 5tedi nidmequin adquidën dadpenshun natiamboshë icnuc matses sebudneposh.

¹¹Abi nidmequid aton icbo Satanasën yuaido uidën uacnuësh choquidbidi niosh. —Unës uanquidquio nec —quequin isadaidbon onqueten abadon caposh. Quidieco matsesën onqueten apoyon caposh.

¹²—Adomboen Nuquin Papan abi tantiesabo cuidendac —camenuen aden ismeposhi. Chiqui dapan chuiboed tauaquin aden ismeposhi daëd ismiabi icnuc.

Chiqui dapan chuiboed utsi

¹³Adnubien shoncate sanamboedën mayan bêda utsin shoncaposh abentsêcshun shoncabi icnuc.

Shoncanubien tauite dapa Nuquin Papan bêtntsiauc tsadunaid yacnuëshquio onquedosh tantiombi.

¹⁴Adec onquequidën nêbi shoncaboed chuiposh. —Acte dapa Eupêdates caid yacnoshon matses cuidquido mayan bêdabo 4tedi uidën uaccoshe. Aido nidmetan. “Mimbi tantiacpadomboen naic nid,” quequin chuitan —caquien chuitamposh. ¹⁵Aden chuitanac aid mayan bêdabo 4tedishun matses dadpenquioshë cuesun secamenuen aton matses utsibo cuesun secate tantiamebeneposh. Nuquin Papan: —Adênquibobi adoendac —quequin tantiacpadomboen adoposh.

¹⁶Adoquien ambi namiaido cabayo catsadquido sondado chedo matses utsibo cuesun secanuec cho-choposh. Aido tambanaidtedi chuisho tantiombi. —Dadpenquioshë iquec cuëte podotedi. 200,000,000tedi iquec —queposh.

¹⁷Êmbi isboedquio nadquio icposh. Abi catsadaid cabayobêdi sondado chedo shicdiadquid cudaste shictonquecuededposh. Shicdiadquid

cudaste isac piumbo yec umumbo yec
 bëshpiu-bëshpiu icquid yec queposh.
 Cabayon mapi bëdi dapan mapibimboec
 isadposh. Ana shëcuënuësh
 nëdënquepamboec
 pushud-pushudpambo yec choposh.
 Cachinan bacuë pisenaid
 nuadac bimboec asupede caid
 icsamboshë nuadposh. ¹⁸Adshumbien
 ana shëcuënuësh choaidën matses
 dadpenquioshë cuesun secabudneposh.
¹⁹Aid cabayo chedon ana shëcuënuësh
 matses cuesun secate icnubi aton
 incuentembi mapi utsi iccondash. Nisin
 mapibimboecquid pianquidquio niosh.
 Aidëntsen matses dadpenquioshë unës
 uabudnequin ismeposhi.

²⁰Adnubien aden Nuquin Papan
 cuidaidën unës uamiabi yaidon
 matsesën abi icsaid ëntiapimbo icposh.
 Ambi naiduidi nabamposh. Ëntiadquidi
 abi icsaquioposh. Nuquin Papa
 tantienquio icquin podobitsi icsabo
 tantiaquin ëntiapimbo icposh. Adembidi
 ambibi nacnenaid ambi papa caid
 ënenquio icquin tantiaposh. Utsibon
 shocosh nacnenaid tantiaposh.
 Utsibombic cuënote. Utsibombic cuëte.
 Adquid ambibi nacnenshun
 tantiabededposh. Ambi nacnenaid anan
 onquetiapimbo icposh. Pabiaten
 tantiatiapimbo icposh. Taën
 caputiapimbo icposh. Adquid papa
 quequin tantiabededposh. Aid
 tantienquio icquin Esusquio
 tantiatiadquidi ambi nacnenauidi
 tantiaposh. ²¹Cuesanquidon abi cuesun
 secaposh. Nënëchoquidombic abi unës
 uabudneposh. Cuëte podo dauë icsa
 chodcaquidombic adembidi matses
 dadpen unës uabudneposh. Aton
 chidopenquio chudquidombic adembi
 utsi chudshumbededposh. Adembidi
 aton bënëpenquio chudmequidën abi
 icsaid ëntiapimbo icposh. Adembidi

aben uequidon abi chudmebededposh.
 Ampequidombic abi ampebededposh.
 Adec matses abitedi: —Nuquin Papan
 cuidnushe. Ëbi icsaid ënu
 —quetiadquidobi adenquio icposh.

Mayan bëdan dada uaidëmpi pemiaid

10 ¹Cabayo uinsadpambo icquid
 ismeboshombic utsitsen
 ismeposhi. Adoac mayan bëda chuiquid
 dapa utsi dacuëdampambo icquidquio
 Nuquin Papa yacnuëshquio budsho
 ispombi. Abu ushubimboec isadec
 abitiombi dasiuidbudpaccosh. Uen
 podqued uenquebudacpamboec mapino
 icposh. Ushëbimboec bëtantete
 bëchamauanquiecposh. Buintad nitsinaid
 nëdënquiacpamboec isquid-isquidpambo
 nidte icposh. ²Dada uaidëmpi bëcadotsaid
 sanamposh. Budash nidtuidposh.
 Tsiembudcuenshun taë abiucshun chian
 dapa mad caid nëtinaquimbi taë
 opiocshon mananuc tincaposh.
 Ënapenquioshë icquid niosh. ³Adashien
 bëdi noshquiacbimboec nuamboshë
 cuëdtoposh. Adec cuëdquin chiac abu
 7tedec cuëdtonequin ëcbedtoneposh
 Nuquin Papan chiaid chuiquin. ⁴Aden abu
 cuëdquin ëcbedtonesho tantiashun: —Abu
 cuëdquin chiaid dada uanu —queshobi:
 —Padi —caposhi Nuquin Papa yacnoshon
 chuiquin. —Abu cuëdquin chiaidtedi dada
 uainda. Padi. Utsibo chuiquin dada uainda
 —caposhi. Adoac dada uainquio iccombi.

⁵Adnubien mayan bëda
 tsiembudcuenshun chian dapa
 nëtinaquin utsiucshun mananuc
 tincaboedën ambibi podo abiucquio
 cadoposh. —Nuquin Papan isnubi
 abimbo chuiquidquio nebi —quequin
 tantiamenuen aden ambibi podo
 abiucquio cadoposh. ⁶Adotanquin
 chuiposhi. —Tantia. Mibi chuinu. ¿Tsutsi
 nidaid uabi yec ëndenquimboshë
 icpampic? Aidi Nuquin Papa nëbi adquid

yec nibëdantiapimbo iquendac. Adquid icquin abitedi uapampic. Abu uashun aidën icquidtedi uapampic. Nidaid uashun aidën icquidtedi uapampic. Acte uashun aidën icquidtedi uapampic. Aden abitedi uaquidën chiaidquio chuinu. Nëbi Nuquin Papan ambi tantiacpadomboen icsambo icquido cuidquimbi abi tantiaquido abëdi tabadmendac. ⁷Ëbi padquid mayan bëda utsin shoncate sanamboedën: “Nëbi nainquin shoncanu,” cacpadënquio Nuquin Papan ambi chiampicpadomboen adoendac —queposh mayan bëda chuiquid dapa dacuëdampambo icquid Nuquin Papan matses cuidquin naimpanuda.

⁸Adnubini abucuësh cuëdquidën chuiposh. —Aid mayan bëdan sanamboed dada uaid bed —cac: ⁹—Dada uaid beccho —capombi. Adoquien: —Në bed. Bedshun che. Batambo icboedi min ana mucambo yanendac —caposhi. —Nëid bedshun chiacbimboen Nuquin Papan chiaid cuiшонquequin isban-isbanash mucambo yanacbimboec Nuquin Papan cuidte tantias shubitiadquio mibi yanendac —quequin tantiamenuen aden chuiposhi.

¹⁰Adoac aid bedshun chiash adquio yanobi. ¹¹Adquio yansho isun mayan bëdabo chuiquid dapan chuioaposhi. —Nuquin Papan ambi chiaid tantiamiac matsesën nabante dadpen mimbi chuiabanendac. Nidaid utsi-utsiec yacno tabadquidon nabantebëdta chuiquid dapabon nabante mimbi chuiabanendac. Aden Nuquin Papan tantiacpadomboen mimbi chuiabanendac —quequin chuiposhi mayan bëdabo chuiquid dapan.

Nuquin Papan namiaidon daëdshun naid

11 ¹—Nuquin Papan tantiacpadomboen mimbi chuiabanendac —quequin chuishumbic mayan bëda chuiquid dapan

piabimboecquid tambante meneposhi. Adotanquin naden chuioaposhi. —Edusaden yacno nidshun Nuquin Papa tabadte shubu uashunaid tambanta. Adotanquimbic Nuquin Papa tantiaquin bëdambo nuadnuc tauinuequin nacenaid dapatsen tambanta. Adotanquimbic Nuquin Papa tantianuec aid shubun pudued-puduedquido tambanta. ²Shubu nuntanquio tambanshun umanucquid daquënë uaid tambanenda. “Ambo Nuquin Papa tantiesabo isadaidpembo pudued-puduedendac. Aidon Edusaden yacnoshon seta abentsë chotsecnuc matamequin dadpen icsa uabudnendac. Adash Nuquin Papa tabadte shubu uashunaid daquënë uaidën pudued-puduedendac,” queshun aid shubu daquënë uaid tambanenda. Aden Edusaden icsa uaquin seta 3tedi matamendac —quequin chuiposhi. —“Muainquio icquin Esusbëdta ëbi tantiaquidombo nec,” quequin Nuquin Papan tantiec —camenuen aden tambanaido tantiameposhi. ³Adnubini Nuquin Papan chuiposh. —Aden Edusaden icsa uanubi matses daëdquioibi ëmbi chuiboedquio chuimendambi. “Nuquin Papan namiaid nec,” quequin matses tantiamenuen comapenen tantiaquido icmendambi. Adoac seta abentsë chotsecnuc matamequin ëmbi chiacpadomboen chuiabanendac. Adquid yec: “Matses abitedi icsamboshë icsho isash shubitiadquio iquebi,” quequin icsambo icquid abi icsaid ëmenuec dashcute icsactsëcquidquio dasiuidendac —quequin Nuquin Papan chuiposhi.

⁴Adshobini mayan bëdan chuioaposh. —Aido Nuquin Papan oncamiaid daëd isadaidbo matses tsusedpan chuiampampid nendac. “Nuquin Papan bëntsiauc cuëte odibos caid nitsinaid daëd bëdambo

icquid iquendac. Ambobidi tabote daëd bëdambo icquid iquendac,” quequin chuipampid nendac. “Nuquin Papan Mayanën tantiamiaidquio icquin ambi chiaidquio chuibanendac,” camenuen aden chuipampic. ⁵Aden abi chuibansho abi chieshënnquidën: “Mibi cuesunenu,” caqui cuesuniadenquio iquendac. Nuquin Papan dayun uaid icquin ana shëcuënuësh choboedën nibëdquiecnuc pichicacimboen abi cuesunenuequidotedi unës uaindac. Nuquin Papan cuidte tantiamenuen adoendac. ⁶Adembidi Nuquin Papan cuidte tantiamenuen Nuquin Papan Mayanën namiaidquio icquin comapenen tantiaquin ismebanendac. Aden ismequin nac abi nidabi yacpadequi ue choenquio iquendac seta 3tedi matamec. Adembidi aidon acte intacuaindac. Adembidi ambibi tantiacpadomboen comapenen tantiaquin dacuëdampamboecquin matses shubimendac Nuquin Papan cuidte tantiamenuen.

⁷Aden Nuquin Papan chiaidtedi aid daëdshun nainquin naindac. Aden nainshobien matses chuiquid icsamboshë icquidën bëdi dapabimboecquidën abidaëdi cuesun secaindac. Satanasën namiacpadomboen adoendac. ⁸Edusaden yacnoshon cuesun secashun chococainquio iquendac. “Ma cuesun secaid ischitono,” qeshun chococainquio icquin podqued ansanendac. Nuquin Icho Esus cuesten decanacnoshonquio matsesën adoendac. Equipito yacno icpampido yec Sodoma yacno icpampido yec quequidbimboec icsamboshë icquin aden Nuquin Papan chiaid chuibanquido cuesun secaindac. ^{9,10}Aden cuesun secabosh: “Nuqui mëyanquid nëid daëd neque. Chococatiapimbo iquebi,” qeshun

chococainquio iquendac. Adashic matses abitedimbo cuesun secaboed isbededec tabadendac. “Nuqui shubimequido cuesun secaosh,” quiash cuishonquec abëd icquidobëd menenancuededendac. Matses abitedimbo caimbi. Nëidic matsesquio. Nëidic mayu. Nëidic nidaid utsi-utsiec yacno tabadquido. Aidedi menenancuededendac. Abentsë chotsec ushquin aden ambi cuesun secaboed isbededec tabadendac —quequin chuiposhi mayan bëdan.

¹¹Adashic abi onquec: —Abentsë chotsec ushquin isbededec tabadbombien Nuquin Papan cuesun secaboed daëd uincuemendac. Uincuemiacsho isash cuishonqueboedobi natia dacuëdec tabadendac. ¹²Adnubi Nuquin Papan abucshun cuënquin: “Nëmbo cho,” cac abu ushu datanec cuesun secaboed daëd abuctoendac. Abi chieshënnquidon isnubi adendac. ¹³Aid daëd abuctonoc nidaid saca-sacaquemboec natiambo uëdëquianendac. Nidaid uëdëquenubi shubu dadpenquio chimeshadbudnendac. Chimeshadbudnequimbi matses catashquin dadpenquio 7,000tedi unës uabudnendac. Adnubien unësabi icquido dacuëdcuededendac. Dacuëdequi: “Nuquin Papa dacuëdampamboecquidëmbien nash. Aidquien tantiatia,” quecuededendac —quequin chuiposhi mayan bëdan. ¹⁴Aden chiqui dapan chuibocpadomboen mayan bëdan Nuquin Papan cuidte utsi chuiposhi. Nainquin chiabi iccoshi. Abi utsi iquec.

Nainquin shoncaquin Uan ismiaid

¹⁵Nuquin Papan uincuemetequido daëd chuibombien mayan bëdan shoncate sanamboedën nainquin shoncaposh.

Shoncanubien Nuquin Papa yacnuësh
nua cuëdëncuededposh naden chiec.

—Nuquin Papabëdi aton Mado
Esuquidistu abided cuidadec
unësaid bëdamboshë iquec.

Abi chieshënuquidon naid ëmeshun
aid abentsëcshumbi matses
abitedimbo namendac ënenquoio
icquin.

Abitedishun Icho nec

—quec cuëdëncuededposh. ¹⁶Adashic
Nuquin Papa yacnombo icho-icboec
tsadten tabadboedobi tsusiobo 24tedi
icquido: —Mibi bëdamboshë iquec
—quequin ismec danëshën
tinquebudcuededposh. ¹⁷Adtanequi
nadec cuëdëncuededposh.

—Nidaid uabi yec ëndenquimboshë
mibi icpampic, Papa.

Nëbi adquid yec nibëdantiapimbo
icquid mibi nec.

Abitedishun Icbombo mibi icnuc:
“Ëmbiquen dëniacquin namenu,”

Satanasën catiapimbo mibi iquec.

Nadatiambo icquid icquin
mimbentsëqui matses abitedimbo
mimbi namendac.

¹⁸ Nidaid utsi-utsiec yacno
tabadquidon abi chuiquidobëdtan
mibi chieshëndene.

Mimbi uaidtedi icsa uadenec.

Adsho mimbi tantiapadënuquo nëbi
mimbi cuidendac.

Matses abitedi uincuemetanquin
mimbi chiaid niac-niaquec
icsaquido mimbi cuidendac.

Adoshombic mimbi chiaid
chuibanquidobëdta mibi
tantaquido abitedimbo mibi
yacno mibëdi mimbi
tabadmendac.

Chuiquid dapambobëdta
chuiquidpenquoio mibi
tantaquidotedi bëdambo
icmequin mimbi adoendac

—quequin tsusiobon Nuquin Papa
chuisho tantiapombi ushquin
isacimboben.

¹⁹Adshun isquien Nuquin Papa
yacnombo con matses isadaidbon
Nuquin Papa tabadte shubu
uashunampid shëcniacchobi icposh. Aid
shubu nuntan isaquien Moisesën ambi
nacnenaid Nuquin Papan chiaid
sandoampid icposh. —Ëndenquimboshë
ambi chiampicpadomboen Nuquin
Papan ambi tantiaidtedi nainquin
naindac —camenuen aden ismeposhi.
Aden ëbi ismenubien bed-bedquetanec
abu teshquianiacbimboec nua
cuëdtoneposh. Nidaid
saca-sacaquemboec uëdëqueposh. Ue
dapa nuamboshë choacbimboec ue tsasi
choposh. —Nuquin Papambo
abitedishun Icbombo nec —camenuen
aden ismeposhi Nuquin Papa
yacnoshon.

Chidobëdta nisibimboecquid dapa ismiaid

12 ¹Adoshombic Nuquin Papa
yacnoshombidi utsitsen
dacuëdampamboecquidbidi
ismoaposhi. Adoac chido ushë
dasiuidacimboec bëchamauanquiecsho
ispombi. Inchëshën ushë tincash
tsadposh. Uispa 12tedi nacnenaid
mauete maueposh. ²Bacuë nua usunec
tishtiadtscëcquio yec
shubibud-shubibudposh. —Isadaidbon
chido Esus tishquid nec —camenuen
aden ismeposhi. ³Adnubien
nisibimboecquid nuamboshë icquid
choposh. Taëchopaidquio yec
piumboshë icposh. Mapi 7tedi icposh.
Pais 10tedi icposh. Aton mapitedi
chuiquid dapabimboec mauete
mauecuededposh. Satanas niosh.
⁴Adshumbic nisibimboecquidën aton
incuenta ënapen icquid uic-uiccaquin
uispa dadpen bedshun nidaidën

siabudposh. —Aden Nuquin Papabëd icquin Satanasën abipadquido utsibo mayan bédabo icboedo utsi-utsien yuapampic. Aden yuash aton yuabobëdi nidaidën choshon matesetsen icsamete bunquiec —camenuen aden ismeposhi. Adshumbic chidon tishacsho bacuë penuen aiduidi bëisquin cainuidposh. ⁵Adnubien chidon dada bacuë tishposh. Bëdambo icquid matses abitedishun Icho ictequidëmpi niosh. Adshobien Nuquin Papan abi yacnombo buamposh nisibimboecquidën petiapimbo icnuc. Buanshumbic abipadquid abitedishun Icbombo icmiac. —Aden Satanasën Esus nibëdametiapimbo iquec —quequin ismeposhi. ⁶Adnubien chido nëbi bacuë tishboed nisibimboecquid dapa cuenë nec matses nibëdacnombo Nuquin Papan tantiacnombo nidposh. Ambobi tabadsho isun Nuquin Papan bëdamboen dayun uaposh yuenquo seta abentsë chotsecnuc matamequin. —Aden Esus tantiaquido Nuquin Papan dayun uaindac —camenuen aden ismeposhi.

⁷Adshumbic Nuquin Papa yacnoshon padpiden ismiac nëidtedi isoapombi. Nëidic nisibimboecquid dapa Satanasquiobi. Nëidic mayan bédabo icboedobi Nuquin Papan chiaid niac-niaquec icsash podobitsi icsabo yanaido Satanasën yuaido. Nëidic Nuquin Papabëd icquidombo mayan bédabo dadpen. Nëidic aido chuquid dapambo Miqued caid. Aidedi ispombi. Adnubien Satanas nadposh. —Aton yuabo mayan bédabo cuemiash Nuquin Papa dëniaquec ëbimbo abitedishun icbo yantsiabi —quiash nicantiadquid icposh. Satanas chedo nidaidën nidmiabi icnuc neposh. ⁸Adshumbic: —Niunchitono —quequin bedbidan-bedbidanaquien Nuquin Papan yuabo Miqued chedo uidënquid

icquido yec niadenquid icposh. Adshumbic Miqued chedon nisibimboecquid Satanas chedo nicaposh. Aton yuabobëdta Nuquin Papa yacnoshon nicaposh. ⁹Nicaquien matses tabadacno nidaidën choec Satanas chedo bud-budposh. Eba caid icsamepampid Satanas niosh. Nëbi matses dadpenquioshë icsamequin yuate bunquiec.

¹⁰Adnubien Nuquin Papa tabadacnoshon anocquidën comapenec onquequin chuibamposh naden chuquid.

—Aden Nuquin Papan aton Mado Esusbëditan abi dëniacnuequido dëniacmenquid icposh.

Nuquin Papa chieshënquidquid icquin abi tantiaquido chieshënquin icsamboen chuishunquid nec.

“¿Esus tantiaquido bëdambo icquidoda nedic? Ëmbi natiamiac aido chieshtotsiash,” quequin Nuquin Papa chuidenequid Satanas nec.

Satanas chedo cuemiash Nuquin Papa aton Mado Esus abided cuidadec unësaidbëdi dëniacadiapimbo yec abitedishun Icbombo nec

—queposh Nuquin Papa yacnuësh cuëdec. ¹¹Adashic padpidec auëshbidi:

—Nëbi ëmbi isac Satanasën Esus tantiaquido chieshtometiapimbo icposh.

Satanasën: “Chieshtomenu,” caqui: “Padi. Esusën yuambo nebi,” quec chieshtoenquid icposh.

Cuidmenquid icnuec abided cuidadec unësaid Esus tantiec chieshtoenquid icposh.

Adsho abi chieshënquidon matsesën: “Padi. Esus tantienda. Cueschitomane,” caqui

chieshtoenquo icquin adenuidi Esus
tantiasho cuesun secameposh
Satanasën aton yua icmiambobi.

¹² Satanasho cuemiaid tantiash
cuishonquenuna.

Nuquin Papa yacno tabadquidotedi
nuquibi cuishonquenuna.

Ëbitedi cuishonquenuc nidaidën
tabadquido matses yec mibi
cuishonquetiapimbo iquec.

Nëshun cuemiac mibi yacno budash
Nuquin Papa chieshënquieci
Satanasho chieshëmënquieci
tabadec.

Mibi icsamete bunquieci. “Nëbi
Nuquin Papa ëbi cuidquieci.
Abi tantiaquido yuashunchitono,”
quec mibi icsamete bunquin mibi
natiambo icmendaci.

Adoac natiaici mibi taba- dendaci
—queposh Nuquin Papa yacnuësh
cuëdec. Aden tantiameposhi.

¹³ Adshumbic ëmbi isadaidbon chido
isboed padpiden ismeposhi. Adoac Esus
tishquid isadaidbon chido unës uanuen
nadancasho ispombi. —Nuquin Papa
yacnoshon nicachitoshi —queshun
chieshënquin nisibimboecquid
Satanasho aid chido nadancaposh.

¹⁴ Adnubien Nuquin Papa chiqui dapan
podobiecquid meniac bedanec aid
podombi cuenec matses nibëdacnombo
Nuquin Papa tantiacnombo chido
cuemposh. Anoshombi
nisibimboecquidën icsa uatiapimbo
icnuc Nuquin Papa aid chido dayun
uaposh. Seta abentsë chotsecnuc
matamequin dayun uaposh. ¹⁵ Adnubien
nisibimboecquidën: —Aid chido unës
uachitono —quequin ambibi ana
shëcuëshun chomequin acte dapa
chido dayun uacno nua chomeposh.
Aden Satanasho Nuquin Papa
tantiaquido isadaidbo matses
nibëdametiadquio iquec. Ademibidi Esus

tantiaquido nibëdametiadquio iquec.

¹⁶ Acte dapa chomiacsho isun Nuquin
Papan nidaid shëcuësh uashun aid
shëcuësh acte nidmiosh chido yacno
chiuidenquio icnuc. ¹⁷ Adsho isun
nisibimboecquidën Satanasho
nëshquioshon aid chidon
bacuëbimbimboecquido Esus tantiaquido
chieshënquioshon. Uesquin cuesun
secatiadquio icposh. Nuquin Papa
chiacpadomboen chieshtoenquo icquin
bëdamboen naquido Esus tantiaquido
caimbi.

Bëdibimboecquid dapa ismiaid

13 ¹ Esus tantiaquido cuesun secate
bunquid ismeboshombic
Satanasho ëmbidi chian dapa mad caid
cuëmashun cainquin ismeoposhi.
Aden cainubien acte uquëducuësh bëdi
dapabimboecquid pudundoposh. Mapi
7tedi icposh. —Nuquin Papa caid
nibëdquieci. Ëbiuidtsëqui abitedishun
icbombo icnu —quequin aton mapitedi
bëdada uadaid neposh. Pais 10tedi
icposh. Aid paistedi chuiquid dapan
mauete paisën dectambampaccosh.
² Aton dada bëdin dadabimboec
isadposh. Aton taë uinsadpambo icquid
utsi oso caidën taëbimboec isadposh.
Ana shëcuësh bëdi utsi tēbuchoquidën ana
shëcuëshbimboec icposh. Adsho isun
Satanasho ambi caimboed chuiquid
dapambo icmeposh. Ambi tantiaidquio
tantiamequin abi icsaid namebamposh.
Adoac matses abitedimbo chuiquid
dapambo yamposh. Aden Satanasho
matses icsamboshë icquid chuiquid
dapa icmequin ismeposhi. ³ Adshumbic
padpiden ismeposhi. Adoac aid bëdi
dapabimboecquid acte uquëducuësh
choboedën mapi abentsëc
mēmuntiapimbo icnuc cuesuniaid
uincuemiaid icsho ispombi. Aden
uincuemiaid icsho isash: —Comapenen

tantiaquidien nechitec —queshun
matses abitedishun acte uquëducuësh
choboedën chuiquid icsamboshë
icquidën chiacpadomboenuidi
nabededposh. ⁴Adshumbic: —Ëbi
chuiquid dapa namequid mibi nec
—quequin Satanas papa caquin
matsesën tantiabededposh. —Aden
Satanasën namiac ëbi chuiquid
dapapadquid utsi nibëdec. Comapenen
tantiaquidquio icnuc utsibon nuqui
cuesun secatiapimbo iquec —queshun
abi chuiquid dapa acte uquëducuësh
choboedtsen tantiaquioposh. ⁵Aden
matsesën tantiaid icquin Satanasën
tantiamiacpadomboen Nuquin Papa
chieshënquie: —Nuquin Papa caid
nibëdquie. Ëmbiuidtsëqui namembi
—quequin matses abitedimbo
nameposh. Aden Nuquin Papan
tantiacpadembi inchëshën ushë 42tedi
nidmeposh seta abentsë chotsecnuc
matamequin. ⁶Aidën Nuquin Papa
chieshënquin naden muauaposh.
—Nuquin Papa caid nibëdquie. Abi
tabadaidtsen nibëdquie. Abi yacno
tabadquido abitedi nibëdquie.
Ambembi chiaid niosh —quec muaposh.
⁷Adshumbic Satanasën
tantiamiacpadomboen Esus tantiaquido
dadpen unës uabudneposh. Adembidi
matses nidaid utsi-utsiec yacno
tabadquido abitedimbo ambi
chiacpadomboen nameposh. —Matses
icsamboshë icquid matses abitedi
chuiquid dapa iquendac —quequin
ushquin isacbimboecnuc ismeposhi.
⁸Aid caic matses abitedishun:
—Nadatiambo icquid nec —quequin
tantiaquiendac. Aid tantiaquido Esus
tantesabo nendac. Ëndenquimboshë
matses uabi Nuquin Papan
tantiampicpadec abided ciudadec
unësaid Esusquio tantesabo nec.
—Adquido yec Nuquin Papan: “Ëbëdi

tabadmendambi,” quequin
chiacmaidombo nec —quequin aden
ismeposhi.

⁹Pabiate cuembo icquin bëdamboen
tanta. Esus tantiaquido icscho mibi
chuinu. ¹⁰Nuquin Papan: —Ëbi
tantiaquid chieshënquin quënën
nauedquido cuidendambi —caindac.
Esus tantiesabon Esus tantiaquido
chështen seshun secaindac. Adsho
Nuquin Papan seshun secanquido
cuidquiendac. Ëbi adsho tantiasch mimbi
nacpadequi chieshtoenquio icta.
Chieshtoenquio icquin Esus tantiaquin
ambi chiacpadomboenuidi nabanta.

Nidaid shëcuënuësh choboedtsen ismiaid

¹¹Adshumbic padpiden ismeposhi.
Adoac aben icquidbimboecquid utsitsen
nidaid shëcuënuësh puduensho ispombi.
Obecan paisbimboec aton pais daëd
icposh. Satanasën ancanquidquio
icmiacpadec dacuëdampamboec
onqueposh. Bëdambo icquid
damianquien muaquin chuibanquidquio
niosh. ¹²Adsho isun Satanasën abia
chuiquid dapa icmeboedën nidaid
shëcuënuësh puduemboed chuiquid
dapatsen icmiac abëdtambi matses
abitedimbo ancaquin nameposh. Aden
namequin abi chuiquid dapa acte
uquëducuësh choboedën
chiacpadomboen matses abitedi
nameposh naden chuiquin.
—Seshuniaid uincuemiondaidën nuqui
chuiquid dapan chiaiduidtsëqui natiad
—caposh. ¹³Aden acte uquëducuësh
choboedën abi chuiquid dapan chiaid
namenuen comapenen tantiaquid icquin
nidaid shëcuënuësh choboedën dadpen
ismeposh. Matses dadpenshun isnubi
abucshun abembi taboadaid budmequin
ismeposh. ¹⁴Aden Satanasën
namiacpadomboen comapenen
tantiaquin ismiac matses dadpenshun:

—Abimbo caic —quequin abi chuiquid
dapa icsamboshë icquidën chiaid
nabededposh Nuquin Papambo
tantienquio icquin. Abi chuiquid
tantiaquid nidaid shëcuënuësh
choboedën: —Nuqui chuiquid dapa
uincuemiaidquio icsho tantiaquin
abibimboecnuc nuamboshë icnuc
nacnenta —cac matsesën nacnemposh.
¹⁵Nacnenacsho isun Satanasën
namiacpadomboen nidaid shëcuënuësh
choboedën abi chuiquid
dapabimboecnuc nacnemboedi
tibocameshun oncameposh. Adoquien
nacnemboedquiobi chuiquid dapa
icsabimboec onquequin: —Ëbi
tantiesabo neque. Cuesun secatan —cac
yuabon abi chuiquid dapa tantiesabo
cuesun secatamposh. ¹⁶Adnubien nidaid
shëcuënuësh choboedën: —Nuqui
chuiquid dapan yuabo nuqui nec
—quequin ancabudquin matses
dadpenquio dada uaquin bësiadmeposh
nëidtedi. Nëidic chuiquid dapabo.
Nëidic chuiquidpenquio. Nëidic dadpen
dayun uaquido. Nëidic aton na
nibëdquido. Nëidic matses yuabotedi.
Nëidic yuapenquio. Aidedi matses
dadpenquioshë dada uaquin
bësiadmeposh. Utsi-utsien bëtanteteno
bësiadmeposh. Utsi-utsien mëdante
abiucquio mësiadmeposh. —Acte
uquëducuësh choboedën ëbi chuiquid
dapan yuabo nec —queshun nameposh.
¹⁷Adshumbic nidaid shëcuënuësh
choboedën chuiposh. —Adec ëmbi
chiacpadec siadambo icquido
piucquidbëdta mitsana utsi menenda.
Ëmbi siadmiaiduidtsëqui mene
—queposh. Utsi-utsiec abi chuiquid
icsamboshë icquid cuëmëdquid dada
uaquin bësiadmiaid neposh. Utsi-utsiec
aid cuëmëdaibimboecquid naden 666
dada uaquin bësiadmiaid neposh.
¹⁸ËAda ëmbi chuiboed tantio?

Bëdamboen tantiaquidën: —Abi
cuëmëdquidquio chienquio icquin
naden 666 chuiquin dada uapac
—catsiash. —Adec matses icsamboshë
icquidquio chuiquid dapa yansho isun
bëdambo icquid danenda —quequin
ushquin isacbimboecnuc aden
ismeposhi.

Nuquin Papan cudasënaido ismiaid

14 ¹Adoshombic padpiden ismiac
abided cuidadec unësaid
Esusquio macuësh dapa Sion caid
mananënquio tabadsho ispombi. Abëdi
abi tantiaquido dadpenquio 144,000tedi
tabadposh. —Con na neque. Chën
—quequin cudasquin Nuquin Papan abi
cuëmëdquidbëdta Esus cuëmëdquid
dada uaquin bësemiaido niosh. —Adec
Esus tantiaquido abëdi tabadendac
—quequin aden ismeposhi. ²Adnubien
Nuquin Papa yacnuësh
ëmidapadpamboec cuëdtoposh? Acte
nua chododoquiabipamboequien
niabiposhi. Abu
tesquianiabipamboequien nechitosh.
Ten-tencate dapa dadpen icbo-icboen
sananquin ten-tencacipamboec
comapenec cuëdëncuededposh. ³Adec
Esusbëdi macuësh mananënquio
tabadboedo 144,000tedi icquido
cuëdëncuededposh. Nuquin Papa
chuiquid dapan tsadten tsadacnombo
cho-choash tabadec cuëdënte chucan
cuëdëncuededposh. Tsusiobo 24tedi
icquidobëdta dadanobi ëshëcquido
4tedi icquidën ambobidi tabadquin
tantianuc adcuëdposh. Abi icsaid
bedshunuec abided cuidadec unësaid
Esus tantiaquidon matsesënuidtsëqui
aid cuëdënte chuca tantiec cuëdënosh.
⁴Aido Nuquin Papa yacno nidabi yec
nidaidën tabadnuc matses utsibo
abitedimbo icsamboecshë tabadnubi
aidoen bëdamboec tabadpanëdash.

Utsibon Nuquin Papa Esusbëdta tantiatiapimbo icnubi aidombien tantiaquiopanëdash. Abided cuidadec unësaid Esus tantiaquid icquin ambi chiapadomboen nabampanëdash. Adonëdaid icquin Nuquin Papabëdta Esus cuishoncamequidombo niosh. ⁵Chieshtoenquo icquin Esus tantiec muesabo icpanëdash. —Adquido iquendac —quequin ushquin isacbimboecnuc aden ismeposhi.

Mayan bëda utsi 3tedshun chiaid

⁶Aido ismeboshombic utsitsen ismiac Nuquin Papan abi yacnoshon uaid mayan bëda uicchun cuenacbimboec abuc cuensho ispombi. Bënudtiapimbo icquid Nuquin Papan chiaidquio matses chuinuec niosh nëdtedi. Nëdic matsesquio. Nëdic matses utsibo. Nëdic nidaid utsi-utsiec yacno tabadquido. Aidedi chuiquin Nuquin Papan matses icsaido cuidte chuinuec niosh. ⁷Abuc cuenquimbi chuibemposh. —Nuquin Papauidtsëqui tantia. “Abu uaquinc nidaid uaquinc acte uaquinc caquid bëdamboshë iquec. Abipadquid utsi nibëdquio iquec,” quequin tantia. Nëbi ambi chiaid niac-niacquido cuidquieque. Aidquio tantia —quequin chuibemposh abuc cuenquimbi.

⁸Adnubien mayan bëda utsi abuc cuenoaposh. Cuenquimbi naden chuibenaposh. —Shubu dadpen icquid Babidonia caid yacnocquido icpampidobimboec icsamboshë icquidobidi icsho Babidonia yacnocquido caimbi. Aidon uisma uanten danoshcacbimboen matses utsibo abitedi Nuquin Papa tantiamenquo icquin icsamequioposh. Aduidequi icsho ëndenquimboshë cuidampicpadomboen Nuquin Papan uesquin cuidquiendac —quequin

chuibemposh mayan bëda utsin abuc cuenquimbidi.

⁹Adnubien mayan bëda utsitsen abuc cuenoaposh. Aidëtsen chuibenaposh. —Tantia. Nuquin Papan cuidtequido chuinu. Chuiquid dapa icsamboshë icquid acte uquëducuësh choboed tantiaquin aidbimboecnuc nacnenaaid tantiaquioposh. Aden abi chuiquid icsamboshë icquid tantiec: “Aton yua nebique. Ismenu,” quiaish ambi tantiaidën chiapadec utsi-utsiec bësiadcuedednubi utsi-utsiec mësiadcuededposh. Aden abi chuiquid icsamboshë icquid tantiaquidon abi tantiatiapimbo icsho Nuquin Papan cuidquiendac. ¹⁰Aidedi chuiquid icsamboshë icquidën yuabo icsho icbobëdtabi Nuquin Papan nëishënquioshon cuidquiendac. Icsaquido cuidquiacno chian anëdënquiacno nësecain adoendac. Abided cuidadec unësaid Esusënquo mayan bëdabobëditan isnubi adoendac. ¹¹Ënenquo icquin adoendac. Aden Nuquin Papa chieshënquidquio tantiec siadaido Nuquin Papan cuidquiendac. Aden cuidsho: “Chiata,” cac “Ai,” quenquo icquin adembi cuidquiendac ënenquo icquin —quequin chuibemposh mayan bëdan. Aden ismeposhi.

¹²Ëmbi chuiboed tantiashun mimbi nabocpadomboembi chieshtoenquo icquin Esus tantiaquin ambi chiapadomboenuidi nabanta. Utsibon chieshënquin: —Padi. Esus tantienda. Cueschitomane —caqui adenuidi ënenquo icquin Nuquin Papabëdta Esus tantiaquiota.

¹³Adnubi Nuquin Papa yacnuësh comapenec onquequin chuiaposhi. —Naden chuiquin dada uata. Chieshëmënnquidon: “Esus tantiec,” queshun cuesun secaido Esus

tantiaquido cuishonquendac —quequin chuiposhi. Adnubien Nuquin Papan Mayanëntsen: —Ai, abimbo caosh. Esus tantiaquido natiaic tabadtenedobi unësash bédamboshë iquendac shubitiapimbo yacno tabadec. Ambi chiacpadquieic bédamboec tabadec unësacsho Nuquin Papan aden bédamboshë icmendac —quequin chuiposhi.

Intac nua icnuc Nuquin Papan cuidtequid chiaid

¹⁴Adoshombic padpiden ismiac abu ushunquo Esus tsadsho ispombi. —Abitedishun Icbombo nebi —quec chuiquid dapan mauetembo shocosh nacnenaid maueshun chështebimboecquid sanamposh.

¹⁵Adnubien mayan bëda utsin abi yacnuësh choquin comapenec onquequin Nuquin Papan chuiboed Esus chuituidposh. —Nëbi nidaidën icquid sinaid butebanquin sando. Nuquin Papan tantiacpadën nëbimbobi nata ¹⁶—caquien chështebimboecquidën sinaid butebanquin sandoposh. —Aden Nuquin Papan tantiacpadomboen abi tantiaquidotedi bedshun abi yacno Esusën buanendac —camenuen aden ismeposhi.

¹⁷Adnubien mayan bëda utsi Nuquin Papa yacnuëshquibidi choposh chështebimboecquid sanampamboec.

¹⁸Adec chështebimboecquid sanampamboec choshobien mayan bëda utsin matses tabadacno cuëte dëtsisadaid isquidquo icquid nidaid masiabudboedën tauite dapa dayunuëshquo choshon comapenec cuëdquin chuiposh.

—Shancuinbimboecquid uba caid nidaidën caniquid chështebimboecquidën mëtebanquin sandoshon buanshun uba tish-tishten

sando ^{19,20}—caquien uba caid mëtebanquin sandoshon buanshun uba tish-tishten sandoposh. Aden abi tish-tishten sandoshon taën tin-tincaquin tish-tishaquien ënë nuamboshë yec piumbo icposh. —Intac nuambo icnuc Nuquin Papan cuidendac —camenuen aden ismeposhi. Adomboen uesquin cuidnuen Nuquin Papan matses icsambo icquido cho-chomendac. Edusaden yacno cho-chomeshun ashunquo Nuquin Papan cuidac matsesën intac nuamboshë chididiquec nua mauanendac. Acte nua chëuëdacbipamboec cabayon mapi yaction intac chëuëdsho isombi. Ënapenquo quidometedos 300ted cactiombi cuësquec nuamboshë matsesën intac chëuëdsho isombi ushquin isacbimboen. —Aden Nuquin Papan abi chieshënquido cuidendac —quequin ismeposhi.

Nuquin Papan cuidtequid 7tedbidi nabanaid

15 ¹Adshumbic Nuquin Papan cuidte tantiamenuen Nuquin Papa yacnoshon dacuëdampamboecnuc padpiden ismeposhi. Adoac matses natamequin cuidquido dacuëdampambo icquido 7tedi icsho ispombi. Mayan bédabo niosh. —Aidon ambi chiacpadomboen ënquimbi matses icsaido cuidsho isash Nuquin Papa nëish bédanendac —quequin tantiaquin ispombi.

²Nuquin Papa yacnobidi chian dapa icposh. Actepenquo yec acte-actectsëcquo isadposh. —Nuquin Papa icsaquido cuidquidquo nec —camenuen tied nëdënquiacbimboec aid bëntse isadposh. Aid cuëmambi Esus tantiaquido tabadposh. Satanasën namiaidën acte uquëducuësh choboedën

chuiquid dapa icsamboshë icquidën:
 —Yuanu —cauidaio niosh. Chuiquid
 dapa icsamboshë icquidbimboecnuc
 nacenaid tantiatiapimbo icquido aido
 niosh. Adecbidi icsamboshë icquidën
 ancabudacpaden nainquio yec aton
 yuabo ictiapimbo yec aid
 cuëmëdaidbimboecquid 666 dada
 uaquin siadmetiapimbo icquido niosh.
 Adec abi tantiaquido icsho Nuquin
 Papan meniaid ten-tencate cuëdëmec
 cuëdëncuededposh. ³Nuquin Papan
 namiaid Moises: —Nuquin Papan nac
 ëbi chieshëncuidon ëbi cuesun
 secainquio icposh —quec
 cuëdëmpampicpadec
 cuëdëncuededposh. Nuquin Papa
 bëdamboen ismenuec abided cuidadec
 unësaidquio Esus aton Papabëdta
 tantiec cuëdëncuededposh naden chiec.
 —Nadatiambo icquin
 nabanquidquio mibi nec, Papa.
 Abitedimbo uaquidquio yec
 abitedishun Icbombo mibi nec,
 Papa.
 Matsesën naid abitedi
 tantiaquidquio abimbo
 chuiquidquio mibi nec, Papa.
 Mimbi naid bëdambo icnuc
 dacuëdampambo mibi iquec,
 Papa.
 Nidaid utsi-utsiec yacno tabadquidon
 Ico icpampidi adecbidi matses
 abitedishun Icbombo mibi nec.
⁴ Matses abitedishun: “Nuquin Ico
 dacuëdampambo icquid neque.
 Ambi chiacpadomboen nanuna,”
 mibi capashun, Papa.
 Mibiuidtsëqui icsaisambo nec, Papa.
 Adquid icquin mimbi
 chiacpadomboen icsaquido
 cuidquimbi bëdambo icquido
 mimbi bëdamboen isendac.
 Adsho isun nidaid utsi-utsiec yacno
 tabadquidon matses abitedishun:

“Mibi bëdambo iquec. Con
 Icbombo mibi nec,” caindac
 —quec cuëdëncuededposh Esus
 tantiaquido.

⁵ Adshun isquien isadaidbon: “Nuquin
 Papa tabadte nec,” quequin
 shubuampicpadquid shubu
 shëcniacchobi icposh. Nuquin Papa
 tabadacnombo tantiamenuen aden
 ismeposhi. ⁶ Auëshquio Nuquin Papan
 chiacpadec ëmbi isboedo mayan bëdabo
 7tedi cho-choposh. Matses icsaquido
 cuidquido niosh aido. —Nuquin Papan
 yuabombo nec —camenuec dashcute
 nac-nacquio icquid dasiuidcuededash
 dashcute bëshpiu-bëshpiumbo icquid
 shictonquecuededposh. ⁷ Adsho isun
 Nuquin Papabëd icquid dadanobi
 ëshëcquid abentsëcshun maspanëmpi
 shocosh piu nacenaid icbo-icboen
 menebamposh. Unëstiapimbo icquidën
 Nuquin Papan nëishëncuioshon cuidte
 cushtoaid maspanëmpi niosh. ⁸ Adnubien
 Nuquin Papa tabadaid nuntanuësh
 pushud-pushudpambo icposh. Adec
 dacuëdampamboecsho isash Nuquin
 Papa chuinuec puduedtiapimbo icposh.
 Ënquin cuidambi padpidec Nuquin Papa
 yacno puduednushi niosh.
 —Abitedishun Icbombo yec
 dacuëdampambo icquidën ambi
 tantiapadomboen icsaquido uesquin
 cuidendac utsibon: “Chën,” cadtiapimbo
 icquin —camenuen aden ismeposhi.

Maspanëmpin cushtoaid

16 ¹ Adec pushudacnuësh abi
 tabadacnuësh Nuquin Papambo
 cuëdsho tantiombi. Maspanëmpi
 bedboedo chuiposh. —Matses yacno
 nidshun maspanëmpin cushtoaid
 chiuinquin matses uesquin cuidta
 —quequin chuiposh Nuquin Papan.
² Adoaquien abentsëcshun ambi
 bedboed maspanëmpin cushtoaid

nidaidëshun chiuimposh. Adnubien ëmbi isboed acte uquëducuësh choboed chuiquid dapa icsamboshë icquidën yuaidotedi natiambo yec chiuë-chiuëtsëcquio yancuededposh. Satanasën namiaidquio icsamboshë icquid tantiaquin abibimboecnuc nacnenaid tantiaquido yec aton icbo cuëmëdquid dada uaquin siadmiaido icsho aden cuidposh.

³Adnubien utsin ambi bedboed maspanëmpin cushtoaid chian dapa mad caid nëchiuimposh. Adoaquien aid chian mad caid intacac. Ënden unësaidën intacipamboecnuc intacuac. Intacuidpambo icnuc acten icquidtedi unësbudneposh.

⁴Adnubien utsintsen ambi bedboed maspanëmpin cushtoaid acte utsitedi nëchiuimbeneposh. Nëchiuimbeniac aidtsen intacposh. ⁵Adsho isun mayan bëda utsin acte dayun uaquidën Nuquin Papa chuiposh.

—Aden mimi cuidsho isun: “Mibi bëdamboshë iquec,” caimbi, Papa.

Nidaid uabi yec ëndenquimboshë icpampidi mibi nec.

Nëbi adquid yec mibi nibëdantiapimbo icquid nec.

Adquid yec abitedishun Icbombo mibi nec.

Icsaisa icquin mimbi chiacpadomboenuidi mimbi naic. Muesambo mibi nec.

Aden mimi chiacpadomboen mimbi icsaquido cuidec, Papa.

⁶“Ëmbi chiaid chuibanquidobëdta ëbi tantiaquido nua intac icnuc chieshëmënuquidon cuesun secabudnepondash,” qeshun cuesun secanquido cuidquin mimbi aton acte intacuashunacsho isun: “Mibi bëdamboshë iquec,” caimbi, Papa

—queposh mayan bëda acte dayun uaquid.

⁷Aden acte dayun uaquidën chuisho tantiaish Nuquin Papa tantiaquin nëish pichicate dapa yacnuëshquio utsi cuëdposh. —Ai, abimbo caic, Papa. Abitedishun Icbombo icquin comapenen tantiaquidquio mibi nec. Adquid icquin matsesën naidtedi mimbi tantiec, Papa. Icsambo icquidon naid abimbo chuiquin mimi aido cuidec. Adsho isun: “Mibi bëdamboshë iquec,” Papa, caimbi —queposh mayan bëda utsi.

⁸Adnubien utsintsen ambi bedboed maspanëmpi cushtoaid badiadën ushë bëchiuimposh. Adoaquien Nuquin Papan namiacpadec matses baded-badedquiec ushën pichiebudneposh. ⁹Adec pichiebudneshumbien Nuquin Papa chushcabededposh. —Icsauidequi icsho Nuquin Papan nuqui cuideque. Nuqui icsaid ënash ambi chiacpadec bëdamboec tabadnuna —quetiadquidëmbi chieshënquin abi cuidquidquio Nuquin Papambo chushcabededposh.

¹⁰Adnubien utsintsen ambi bedboed maspanëmpin cushtoaid chiuimbenequin acte uquëducuësh choboed chuiquid dapa icsamboshë icquid ambi namiaidobëd tabadacno chiuimbenequin. Adoaquien inchëshposh inchëshquio yec. Badiadenquio icposh. Adsho isash matses abitedi natiambo dacuëdcuededposh. ¹¹Adec dacuëdcuededec: —Ambi chiaid niac-niacsho Nuquin Papan nuqui cuideque. Nuqui icsaid ënash ambi chiacpadec tabadnuna —quetiadquidëmbi: —Natiambo chiuëmianec Nuquin Papa icsambo iquec —qeshun Nuquin Papa chushcabededposh.

¹²Adnubien utsintsen ambi bedboed maspanëmpin cushtoaid acte dapa Eupëdates caid nëchiuimposh. Adoquien Eupëdates caid acte nua icboedi nibëdquio yec uesadposh. Ma matses utsi-utsiec aton chuiquid dapabobëdi tsidadash Esus chedo cuesun secanuec ushë choacmiuësh choquin ma potenuequin aden acte uesadmepposh.

¹³Adec aid matses cho-choabi icnuc ushë choacmishun cho-chometequidëmpi naden ismeposhi. Coqueshbimboecquid podobitsi icsa 3tedi ana shëcuënuësh cho-chosho ispombi. Nëidic nisi dapabimboecquid Satanasën ana shëcuënuësh choquid. Nëidic acte uquëducuësh choboed chuiquid dapa icsamboshë icquidën ana shëcuënuësh choquid. Nëidic nidaid shëcuënuësh choboedën Satanasën muauamequin oncameboedën ana shëcuënuësh choquid. Aidedti chosho isombi. ¹⁴Satanasën yuabo icquin comapenen tantiaquin nacnenquido niosh. Matses utsi-utsien abi chuiquid dapabobëdtabi namenuc niosh. —Aidon namiac chuiquid dapabo abitedi aton yuabobëdi tsidadash ushë choacmiuëshquio cho-choendac. Nuquin Papa chieshënnquin Esus chedo cuesun secanuec adec cho-choendac. Nuquin Papan tantiacpadënnquibi adendac —camenuen mayan bëdan aden ismeposhi.

¹⁵Adnubien Esusquio cuëdposh. —Tantia. Chuinu. Mimbi: “Nëbimbobi aid choec,” cacmaidquieni choendac. Ushenquio yacbibmoen ëbi ënenquio icquin tantiec: “Nëbien Esus chochitec. Choshon nuqui icsaid abitedi chuiquin cuidnushe. Bëdamboec tabadnuna,” quec bëdamboec tabadta. “Nëbi nidnu. Nid,” cac: “Ai, con na ënden nacnenombique. Baded nid,”

quiacbimboec icta ëbi cainec —queposh Esus.

¹⁶Adnubimbi coqueshbimboecquid podobitsi icsabon namiac matses utsibo chuiquid dapabo abitedi aton sondadochedobëdi cho-chosho ispoc. Nidaid Isadaid caid yacno macuësh icscho isadaidbon onqueten Admaquedon caid yacno cho-choposh Esus chedo cuesun secanuec.

¹⁷Adnubien maspanëmpi bedboed utsintsen ambembi chiuinquin Nuquin Papan cuidte ënquimbi ismeposh. Ambembi chiuinubien abi tabadacnuëshquio Nuquin Papa cuëdposh. —Padi. Nëbi ëmbi tantiacpadomboen ënquimbi cuidec —queposh. ¹⁸Adnubien abu bed-bedquetanepamboec abu tesquianenuec natiamboeshë shëc-shëcquemboec nidaid uëdë-uëdëquiamposh. Nuquin Papan tauamboen matses uambi adec nidaid uëdëquiambo. Bëdiactscë nidaid uëdëquedenedi acquimboec uëdëquiamposh. ¹⁹Adnubien matses dadpen yacno Babidonia caid yacnuësh nidaid abichobi icboedi 3tedi yanec tiadbudneposh. Aden Nuquin Papan: —Anocquido icsamboshë icquido nec —quequin Babidonia caid yacnocquido uesquin cuidquioposh. Adec nidaid uëdëquenubi nidaid utsi-utsiec yacno shubu dadpen icquid yacno-yacnomboec shubu abitedi uesadec chimeshadbudneposh. ²⁰Nidaid uëdëquenubi chian dapa mad caid yacno acte nënantan nidaid icquid abitedimbo nibëdambudneposh. Adecbidi macuësh abitedi nibëdambudneposh. ²¹Abucuëshquio ue dapa choacbimboec ue tsasi nuacquid dapa quidos 50 icnuc yuë tanaid dadpenquio paëdbudnequimbi matses tish-tishbudneposh. Aden ue tsasi dapan

mëyansho isun padenquo
ictiadquidëmbi matsesën Nuquin Papa
chushcabededposh. —Nuqui icsaid
ënshun Esus tantianuna
—quetiadquidëmbi chushcabededposh.
—Adquido iquendac —quequin ushquin
isacbmboecnuc aden ismeposhi.

Chido chishpidabimboecquid ismiaid

17¹Adshumbic maspanëmpin
icquid chiuimboedën
abentsëchshun chuiuamposhi. —Isec cho.
Mimbi isboed Babidonia caid
yacnocquido cuidte mibi ismenu.
“Babidonia caid yacnocquido matses
utsibo dadpenquo icsamete bunquido
nec,” quequin chido
chishpidabimboecquid acte dapa bëntse
tsadsho mibi ismenu. “Adquid icsho
Nuquin Papan cuidquiendac,” quequin
mibi ismenu. ²Aido icsamboshë iquec.
Matses utsi-utsien abi chuiquid
dapabobëdta uisma uanten
danoshcabcimboen Nuquin Papambo
tantiamenquo icquin ambi chiaid
niac-niacmequioposh. Aido cuidsho isec
cho —queposh.

³Adshumbic ushquin isacbmboecnuc
ismeposhi. Nuquin Papan Mayanën
tantiamiac masiuidquo yacno shubu
nibëdacnombo chido aben icquid dapa
catsadsho ispombi. Aben icquid
piumboshë icposh. Aidën dadan:
—Nuquin Papa caid nibëdquo iquec
—quequin uesquin dada uapaidquo
icposh. Aton mapi sietetedi icnuc aton
pais 10tedi icposh. —Mimbi isboed acte
uquëducuësh choboed chuiquid
icsamboshë icquidquo nec —quequin
aden aben icquid ismeposhi. ⁴Aid
catsadquid chido dashcute piumbo
icquidbëd umumbo icquid dasiuidposh.
Shocosh piu nacnenaid chedo
cuënotempi nac-nacquio icquid chedo
payuec aidbidi mësiuidposh. Dëshote

bëdambo icquid sanamposh. Aden
sanansho dëshote anisquin isaquien
icsambo icquiduidquo icposh. —Chido
chishpidabimboec Babidonia caid
yacnocquido icsamboshë iquec. Uisma
uanten danoshcabcimboen: “Nuquin
Papa caid nibëdquiec,” quequin
tantiamenquin matses utsibo dadpenquo
icsamequiendac —camenuen aden
ismeposhi. ⁵Adshun isquien aid chido
abi tantiamete abi cuëmëdquid
bëtanteteno bëdada uadac. —Babidonia
yacnocquido bëdambo icquido
damianquidi icsamboen tabadmequido
nec —quequin dada uaid icposh. ⁶Aid
chido paëmbo icquid acacbmboec Esus
tantiaquidon intac acash tantiaidenquo
yamposh. —Babidonia caid
yacnocquidon Esus tantiaquido dadpen
cuesun secaindac —quequin
tantiamenuen aden ismeposhi.
Dacuëdampamboecsho isash:
—¿Mitsipadquiopequini ique?
—quebudquibobi.

⁷Adbudquioshobini aid mayan bëdan:
—“Tantiaidenquo iquec,” ¿quecta ique?
Tantia. Chido chishpidabëdta abi
catsadaid aben icquid chuinu. ⁸Mimbi
isboed aben icquid icsamboshë icquid
ictenedi nëbi nibëdec. Yuecshun
Satanasën abi tabadacnoshon padpiden
chomendac. Adoacsho yuecshun Nuquin
Papan chian anëdënquiacno
nësecaindac. Aden cuidabi Satanasën
chomebocsho isun Nuquin Papa
tantiesabon: “Comapenen tantiaquidien
nechitec. Matses nibëdanëdaidi
uincuenashien choachitosh. Aidi
tantianu,” caindac. Matses uabi icquin
Nuquin Papan: “Ëbi tantiaquido
iquendac,” cacmaidonquo adoendac
—queposh mayan bëda.

⁹Adshumbic padpiden chuiposhi.
—Tantia. Ëmbi chuiboed bëdamboen
tantiamenuen chuinu. Naden

tantiamentuen aben icquidën mapi 7tedi icquid mibi ismiombi. “Babidonia caid yacno matses icsa uaquido tabadacno macuësh dapa 7tedi iquec,” quequin tantiaquimbibi: “Chuiquid dapabo 7tedbidi iquendac,” camenuen aid mapi 7tedi mibi ismiombi. ¹⁰Aid chuiquid dapabo 5tedi nibëdnubi utsi abi iquec. Nëbi aidën aton matses namec. Utsitsen choendac. Choshon aton matses nametantsequi badedquio nibëdanendac. ¹¹Nibëdanëdaidi choashic ëmbi ismeboed acte uquëducuësh choboed chuiquid dapa icsamboshë icquidquio iquendac. Aidën ëmbi chuiboedo chuiquid dapabo 7tedishun namiacimboen aton matses icsamboenshë namendac. Adoacsho isun Nuquin Papan icsaïdo cuidquiacno nësecaindac —queposh mayan bëda.

¹²Adashic abi onquec: —Naden tantiamentuen aben icquidën pais 10tedi icquid mibi ismiombi. Chuiquid dapa utsibo 10tedi iquendac. Nëbi aton matses namiabi iquec. Padabi. Adquido yanendac. Satanasën acte yacnuësh choeboedbëdta chuiquid dapabo icmiac matses icsamboenshë namiash yuec tabadabi badedquio nibëdanendac. ¹³Nibëdanabi icquin aidon acte uquëducuësh choboed abi chuiquid dapambo icmendac. “Aidën namiac abi tantiaquidobëdta Esus nuquitedishun cuesun secatsiac nibëdquio icnuc,” queshun aden icsamboshë icquid abi chuiquid dapa icmendac. ¹⁴Aden Esus chieshënuquidon: “Chieshtomenu,” cac Esusën yuaido abi tantiaquidotedi chieshtoenquio iquendac. Aton Icbo Esusën abided cuidadec unësaïdën namiac chieshtoenquio iquendac. Aden abi tantiaquidobëdta chieshënuquin cuesun secanuëc cho-chosho isun Esusëmbi cuesun secaindac. “Ëbien matsesën Icbombo nec,” quetanquin adoendac —queposh mayan bëda.

¹⁵Adashic padpidec: —“Nidaïd utsi-utsiec yacno tabadquido dadpenquio Babidonia caid yacnocquidon icsamendac,” quequin tantiamentuen chido chishpidabimboecquid acte dapa bëntse tsadsho mibi ismiombi. ¹⁶Aden Babidonia caid yacnocquidon nasho isun mimbi isboed chuiquid dapa icsamboshë icquidën abëdta chuiquid 10tedi icquidbëdta Babidonia caid yacnocquido chieshënuendac. Aden chieshënuquin cuesun secatanquin shububëdtabi nëdëncaindac nibëdquiecnuc. ¹⁷“Ma Babidonia caid yacnocquido uesquin cuidnu,” quequin ambi tantiacpadomboen Nuquin Papan aden acte uquëducuësh choboed chedo chuiquid dapabo icmendac. ¹⁸“Matses utsi-utsien chuiquid dapabo aton matsesbëdtabi yuaquid abi iquec,” quequin mibi chido chishpidabimboecquid nëbi ismiombi —quequin mayan bëdan chuiposhi.

Nuquin Papan Babidonia caid yacnocquido cuidaïd

18 ¹Aden Babidonia yacnocquido cuidte chuisho tantiaboshombic mayan bëda utsi Nuquin Papa yacnuësh abucuësh budsho ispombi. Nuquin Papan icmiacpadquid mayan bëdabo chuiquid dapa yec bëchamauanquiecposh. ²Choshombic nua cuëdquin chuiposh. —Babidonia caid yacnocquido Nuquin Papan uesquin cuidquendac. Aden cuidac matses nibëdquiecnuc abi tabadtenecnombo podobitsiuidpambo tabadendac. Ambobidi edesteuidquio tabadendac. ³Babidonia caid yacnocquidon matses utsibo abitedimbo abi chuiquid dapabobëdta Nuquin Papa tantiamentuenquio icquin icsamequipoposh. Adembidi abi bunaid bednuen matses

utsibo piucquid dadpen menedenequin Nuquin Papa tantiamenquio icposh. Adsho Nuquin Papan cuidquiendac —quequin mayan bédabon chuiposhi. ⁴Adnubien Nuquin Papa abucüesh onqueposh. —Tantia, Esus tantiaquido. Mibitsen chuinu. Babidonia caid yacnocquidon nacpadomboen nainda. “Aidobëdi icsasho ëbitsen cuidquionoshe,” qeshun aidon namiacpadomboen nainda. Auëshquio niqueta —quesho tantiombi. ⁵Nuquin Papa yacnoshombidi utsin chuiposh. —Ënëdenquio yec icsauidequi icsho isun ambi tantiacpadomboen Nuquin Papan cuidquiendac. ⁶Babidonia caid yacnocquidon matses utsibo dadpenquio icsamequioposh. Aden icsamequido icsho Nuquin Papan nëbi nëishquioshon uesquin cuidquiopashun —queposh mayan bëda. ⁷Adashic abi onquec: —Babidonia caid yacnocquido cuidtequido nec. Ambi naiduidi naquin aton na dadpenquio bedash: “Aidtedi dayun uaic bédambo iquebi,” quepec Nuquin Papan cuidte tantienquio yequi. Adsho tantiashun: “Natiambo icnuc comapenen cuidquiopashun,” caimbi. Otacquo tantiec: “Nuquin matses yuabo dadpen icnuc nuqui bédamboec tabadec. Chido niente bënë unësaid mëyadacimboec mëyadtiapimbo nuqui iquendac,” quechitequien iquec Babidonia caid yacnocquido Nuquin Papa tantiatiapimbo yec. ⁸Adsho ambi: “Nëbi ëbi cuidec,” cacmaidënquio cuidendac. Nuquin Papanquio abitedishun Icbombo icquin comapenen tantiaquin nacnenquidquio icquin badedquio cuidquiendac. Aden dadpenquio unës uabudniacsho isash natiambo sedenquecuededendac. Aton pete nibëdquiecnuc natia bunendac. Aton shububëdi dadpenquio nédënquendac —queposh mayan bëda.

⁹Adashic abi onquec: —Adec Babidonia yacnuësh nédënquec pushudtonesho isash: “Aidon namiacpadomboen Nuquin Papa tantienquio icquin con na dadpen bedtenembi,” quequin chuiquid dapabon nadambocain sedencabededendac. ¹⁰“Tantia. Nuqui tantiaido sidquebudneque,” quec uinte päëdtampamboec dacuëdtanash uanoshon isec tabadendac. Adec tabadec: “Aido unësquimboshë iquec. Aton matses aton yuabobëdi dadpenquio icpadenec. Ambi dayun uaid dadpenquio icpadenec. Matses utsibo dadpen namepadenec. Aido tantiac unësquimboshë iquec. Badedquio uesquin cuidquiopac,” quec sedenquecuededendac Babidonia caid yacnocquido tantiec —queposh mayan bëda.

¹¹Adashic abi onquec: —Babidonia caid yacnocquido aden cuidacsho isash utsibotsen: “Ëmbi meniaid bedshun piucquid dadpen menedenebi. Nëbi adquid nibëdquieci. ¿Tsuntsimbini ëmbi meniaid cuidquin piucquid menepatsiashba?” quec sedenquecuededendac. ¹²Aidobidi: “Nadquid Babidonia caid yacnocquido menequin piucquid dadpen bedtenembi. Nèidic shocosh piu. Nèidic shocoshquio. Nèidic casëdubimboecquid cuënote bédambo icquid. Nèidic dashcute bédambo icquid. Nèidic dashcute piumbo icquid. Nèidic dashcute umumbo icquid. Nèidic sëntebimboecquid nacnenaid. Nèidic aben icquid edepanten shëta nacnenaid. Nèidic cuëte utsi bédaidquio nacnenaid. Nèidic shocosh utsi nacnenaid. Nèidic cuënote nac-nacquio icquid nacnenaid. Piucquid dadpen menequin adquidtedi Babidonia caid yacnocquidon bedpadenec. ¹³Utsitsen dadpen

bedpadenec. Nèidic batambo icquid sabimboecquid. Nèidic bēdambo nuadte. Nèidic bēdambo nuadec danoshquete. Nèidic acte paēmbo icquid. Nèidic bēchi. Nèidic pan nacentequid. Nèidic nēish yua baca caid. Nèidic nēish yua utsi obeca caid. Nèidic nēish yua cabayo caid. Nèidic matses antsadsho cabayon nimbanquin buante. Nèidic ambi chonoa uatequido matses ambi ampequin bedaïdo dadpen. Babidonia caid yacnocquidon aïdtedi dadpenquo bedtenesho aton piucquid dadpen bedpadenembi,” quependac nidaïd utsi-utsiec yacno tabadquido —queposh mayan bēda.

¹⁴Adashic abi onquec: —Abi piucquid menedenedēn dayun uaid nibēdanesho isash: “Aïd matses bunaidquio ambi dayun uaid pete nibēdquiec. Ambï dayun uaid dashcute bēdambo icquidbēd aton na utsi dadpen abitedi nibēdquiec,” ¹⁵quiash natiambo dacuēdec uanoshon isec tabadec sedenquecuededendac abi piucquid menedenedo tantiec. ¹⁶“Aïd matses tantiac unēsquimboshē iquec. Matses dadpen yuaquin matses dadpen namepadenec. Aton matses dashcute bēdambo icquid dasiuidcuededtenec. Utsi-utsiec dashcute piumbo icquid dasiuidnubi utsi-utsiec dashcute umumbo icquid dasiuidcuededtenec. Utsimbic casēdubimboecquid shocosh piu nacenaid payudenec. Utsibic casēdubimboecquid utsi payuec mēsiuidtenec. Adec: ‘Con na dadpenquo icnuc bēdamboec tabadebi,’ quepadenec Babidonia caid yacnocquido. ¹⁷Adsho isun Nuquin Papan abi ushēmbi cuidquiac ambi dayun uaidbēd aïd matses badedquio nibēdanac,” quec sedenquecuededendac abi piucquid menedenedo tantiec. Adecbidi nidaïd utsin icquidotsen

sedenquecuededendac. Nèidic cano dapa dancha icbo. Nèidic dancha icbobēd nidquido aton yuabo. Nèidic icbo piucquid meniash dancha antabēdtoquido. Nèidic nuēcquid bedshun piucquid bednuen menequido. Aïdtedi uanoshon isec sedenquecuededendac. ¹⁸Nēdēnquec pushudtonesho uanoshon isash: “Adquido utsi nibēdec,” ¹⁹quiash natiaquiec sedenquecuededendac. Adec shubiec: “Ēbipadquid dancha icbon bēaïdtedi bedshun piucquid dadpen menedenedo tantiac unēsquimboshē iquec. Is. Cuidquiac badedquio nibēdanaque,” quec sedenquecuededendac —queposh mayan bēda.

²⁰Adashic mayan bēdabidi: —Ēbien cuishonquendac. “Nuquin Papa yacno tabadquidotsen ēbēdi cuishonque,” quequin chiendambi. Esus tantiaquido chuiquinc Esusbēd icquidombo chuiquinc Nuquin Papan chiaïd chuïbanquido chuiquinc caquin: “Cuishonquec tabadnuna. Mibi chieshēnquin natiamiacpadomboen mibi chieshēnquido Nuquin Papan uesquin cuidquioshe,” quequin chiendambi —queposh mayan bēda.

²¹Adnubien mayan bēda utsin uidēnquio icquidēnquio nidaïd moco nuacquid dapa yuēmboshē icquid cadotanquin acquimboen acte nēnebïdanquimbi chuïposh. —Ēmbi acquimboen nēnebocpadomboen Nuquin Papan Babidonia caid yacnocquido uesquin cuidquiendac nibēdquiecnuc. ²²Adoac aïdo ictenecnombo nadimbo iquendac. Ten-tencate ten-tencainquio iquendac. Utsibobic cuēdēnenquio iquendac. Utsibombic shoncate shoncainquio iquendac. Cuēte chēshun nacenēnquio iquendac. Piacbo macuesenquio

iquendac. Nadimboshë iquendac.

²³Tabote taboadaid nibëdendac. Dada aton chido ambi nëbi bedaidbëdi mamënenquo iquendac. Nibëdec. Nadimboshë iquendac. Adsho isash utsibo: “Babidonia caid yacnocquidon aton piucquid bednuen comapenen tantiaquin ambi naiduidi napadenec. Aden naquin ambi icsamboen tantiaid matses utsibo abitedi adembidi tantamequin icsamepadenec,” quendac.

²⁴Nuquin Papan cuidabi icnuc aden icsamequin Babidonia caid yacnocquidon Nuquin Papa chieshëquin ambi chiaid chuibanquidobëdtabi Esus tantiaquido dadpen cuesun secaindac. Adsho isun aidon yuaido matses utsibon adembidi Esus tantiaquido cuesun secaindac. Adsho isun Nuquin Papan uesquin cuidquindac —queposh mayan bëda.

**Chieshënkuido cuidacsho
isash cuishonquiaid**

19 ¹Aden mayan bëdan Nuquin Papan Babidonia caid yacnocquido cuidte chuisho tantiombi. Adshun tantiaquien Nuquin Papa yacnuëshquo Esus tantiaquido dadpenquioshë comapenec cuëdëncuededposh.

—Nuquin Papa bëdamboshë iquec. Aiduidtsëqui matses abitedishun Icbombo nec.

Aton Mado abided ciudadec unësaid tantiasho matses bëdamboen isec.

²Muesambo icquin ambi chiacpadomboen naquidquido nec. Abi tantiesabo ënëdenquo yec icsauidequi icsho cuidquidquido nec.

Adquid icquin: “Icsamboshë iquec,” quequin matses utsibo icsamequido Babidonia caid yacnocquido cuidquiosh.

Nuquipadquid Esus tantiaquido cuesun secacsho isun cuidquiosh

—quec cuëdëncuededposh.

³Adashic padpidemboec:

—Nuquin Papa bëdamboshë iquec.

Is. Pushud-pushudpambo icnuc nëdëncquin Babidonia caid

yacnocquido uesquin cuidquioshe

—quec cuëdëncuededposh Esus tantiaquido dadpenquioshë.

⁴Adsho tantias Nuquin Papa chuiquid dapan tsadten tsadnuc abi dacuenadec tabadquido: —Nuquin Papa Nuquin Icho nec —quequin ismenuec danëshën tinquebudcuededposh. Adec tinquebudcuededequi: —Abimbo caic. Nuquin Papa bëdambo iquec —quecuededposh dadanobi ëshëcquido 4tedi icquido tsusiobo 24tedi icquidobëdi. ⁵Adashic auëshquibidi abentsëc cuëdposh.

—Nuquin Papa matses uaquidquido yec bëdamboshë iquec, canuna.

Nuquibi abi tantiaquidtedishun:

“Nuquin Papa bëdamboshë iquec,” canuna.

Aton yuabo icquin nuquitedishun adonona.

Chuiquid dapabo aton yuabobëd icquimbi nuquitedishun: “Nuquin Papa bëdambo iquec,” canuna

—queposh.

Esusën abi tantiaquido beduante chiaid

⁶Adsho tantias abu tesquianiabimboec acte nua chododoquiabimboec Nuquin Papa yacnocquido dadpenquo cuëdëncuededposh.

—Abi chieshënkuidon Nuquin Papa dëniactiapimbo iquendac.

Ambentsëqui abitedimbo namendac.

Nuquin Papa bëdamboshë iquec.

⁷ Nuquin Papa tantiec
cuishonquenuna. Nuquin Papa
bëdamboshë iquec.

Dadan aton chido buntacquo
beduanacimboen abided
cuidadec unësaid Esusën abi
tantiaquido beduanshun abi
yacno tabadmendac.

Bënën beduanabi yac chido: “Con
bënën nëbi beduanebi,” quia-
sh nacnemëdquiacimboec:

“Nëbien con Icho chochitec,”
quia-
sh Esus tantiaquido bëdamboec
tabadec.

⁸ Abi tantiasho Nuquin Papan
bëdamboen isaido yec abi icsaid
ënash:

“Nëen con Icho chochitec,” quia-
sh bëdamboec tabadec.

Aden abi tantiasho Esusën dashcute
chuca ushumbo icquid
dasiuinacim- boen abitedi
icsaisa icmendac

—quec comapenec cuëdëncuededposh.

⁹ Adnubi mayan bëdan chuioaposhi.
—Ëmbi chuibocpadomboen dada uata.
“Isadaidbo aton chido bedquin aton
matses cho-chomiash pemec bëdamboec
tabadquid. Adembidi abi tantiaquido
Esusën: ‘Cho,’ cac abi yacno nidaniash
cuishonquequiec tabadendac,” quequin
dada uata. Abimbo caimbi. Nuquin
Papan chiaidquio chiec nebi —queposh
mayan bëda.

¹⁰ Adsho tantiashini Nuquin Icho
danec ismenuec danëshën
tinquebuduidpoc. Adshobini: —Ëbi
aden ismenda. Nuquin Papauidsëqui
aden ismeta. Mibipadquid Nuquin
Papan yuabidi nebique. Nuquin Papan
Mayanën Esus tantiamequin Nuquin
Papan chiaid dada uamepampic.
Aidëmbidi namiac mibipadquidobëd
Esusën yua nebique. Ëbi aden ismenda
—queposh mayan bëda.

Cabayo ushu catsadquid bëdamboshë icquid

¹¹ Adshumbic abuc isquin Nuquin
Papa yacno shëcnepamboacsho ispombi.
Adshun isquien auëshquio cabayo
ushumbo icquid catsadec chuiquid
dapambo choposh. Adsho isun: —Abi
tantiaquidobëd cuëshëdtiapimbo icquid
yec ambi chiacpadomboen naquidquio
Esusquio nec —quequin tantiombi.
Ambi chiacpadomboen icsaido
cuidquidquio icquin icsaido cuesun
secanuec niosh. ¹²—Matsesën
ompodëmëdtiapimbo icquidquio nec
—camenuec cuëte isquidquio
icquidbimboec ëshë icposh.

—Abitedimbo chuiquid dapambo nebi
—quec mauete dadpen maueposh. Abi
cuëmëdquid abi bëdada uadaid
tantiadenquio icposh. Utsibon
tantiatiapimbo icnuc ambentsëqui
tantiatie niosh. —Nuquin Papabëdan
Esusën naidtedimbo matsesën
tantiatiapimbo iquec —camenuen adec
bëdada uadaid ismeposhi. ¹³Abi
cuëmëdquid utsiembi tantiatsëccoc.
—Nuquin Papapadquidquio yec abi
tantiamianquid nec —quequin cuënaid
niosh. Aton dashcute bëntse icquid
cuidaidën intaquën punacimboec
piumboshë isadposh. —Abi tantiesabo
cuidquidquio nec —camenuen aden
ismeposhi. ¹⁴Esus bëyuc nidnuc abi
tsibanec abi tantiaquidobëd mayan
bëdabo cabayo ushucquidquidquio
catsadcuëdedec cho-choposh. Icsaisa
icmiaido yec dashcute ushumbo icquid
bëchish nibëdquidquio
dasiuidcuëdedposh. ¹⁵Abi bëyucquid
ana shëcuënuëshquio chështe cuënumbo
icquid cueshqueposh. —Ambi
chiacpadomboen matses icsaido abitedi
cuidquidquio Esus nec —camenuen
aden ismeposhi. Adquid icquin nidaid

utsi-utsiec yacno tabadquido icsauidequi icsho uesquin cuesun secaindac. Nuquin Papan chiacpadomboen naquin shancuinbimboecquid uba caid nua ënë icnuc tish-tishac bimboen nua intac icnuc cuesun secaindac. ¹⁶Aton dashcute bëntse icquidën abi cuëmëdquid utsi dada uaccosh. —Abipadquid utsi nibëdnuc abitedimbo chuiquid dapambo yec abitedishun Icbombo nec —quequin dada uaccosh. Aton bëusudquid yacnombo adembidi dada uaccosh.

¹⁷Adnubien ushë mëducquio tabadquin mayan bëda utsin edeste chedo abuc cuen-cuensho comapenec cuëdquin chuiposh. —Nuquin Papan cuidquin cuesun secaidon nami chec cho-cho. ¹⁸Ëmbi chiacpadec cho-choshon matsesën nami mimbi nua tēpuisquin chendac nēidtedi. Nēidic matses utsi-utsien chuiquid dapabo. Nēidic sondado chuiquid dapabo. Nēidic dada cuesabo. Nēidic cabayo chedo abi catsadquidobëdtabi. Nēidic matses utsibo abitedimbo. Nēidic matses yuabo. Nēidic matses yuapenquio. Nēidic bacuëbo. Nēidic caniaido abitedi. Adquidtedi uesquin chec cho —quequin edeste chedo chuiposh. —Ambi tantiapadomboen Nuquin Papan matses uesquin cuidquiendac —quequin aden ismeposhi.

¹⁹Adshumbic mayan bëdan ismeboedo Esus chedo cuesun secanuec cho-chosho ispombi. Acte uquëducuësh choboed chuiquid dapam boshë icquid chedo nidaid utsi-utsiec yacno tabadquido abi chuiquid dapam chedobëdi tsidadash cho-choposh coqueshbimboecquid podobitsi icsabon namiapadec. —Cabayo ushumbo icquid catsadquid Esusquio abi tsibanquidobëdta cuesun secanu —caqui ²⁰cuesun secadenquio

icposh. Adshobien Esusën acte uquëducuësh choboed chuiquid dapam icsamboshë icquid bedposh. Adotanquimbic aid tantiamequid nidaid shëcuënuësh choboed Satanasën oncamiadtsen bedposh. Aid comapenen tantiaquin ismequin muaquin abi chuiquid dapam icsamboshë icquidën chiacpadomboen matses namequidquiao niosh. Adec muaquin abi chuiquid dapabimboecnuc nacnamequidtsen niosh. Adecbidi: —Ëbi chuiquidën yuabo nec —quequin matses dadpen bësiadmequid niosh. Adec icsamianquidquiao icsho bedposh. Abi chuiquid dapabëdta bedshun unës uabi chian dapam ënëdenquio yec anëdënquequid icsamboshë nuadquidquiao nësecaposh. ²¹Adshumbic Esusën ana shëcuënuësh chështe cuënumbo icquid cueshquequidën: —Ëbi chieshënquidotedi unësta —caquien cho-choboed utsibo abitedi unësbudneposh. Adsho isun caimboedon edeste chedon nua-nuaic tēpuisquin matsesën nami chebededposh. —Aden Esusën abi chieshënquido nibëdamendac —camenuen aden ismeposhi.

Satanas uidën uaid

20 ¹Adshumbic padpiden ismeoaposhi. Adoac mayan bëda utsi Nuquin Papa tabadacnuësh budsho ispombi. Podobitsi icsabo Satanasën yuabo shëcuën tabadacno bëtashaid chictëbëdta shocosh bucubimboecnuc nacnenaid dapam sanamposh. ²Adshumbic Eba icsamenuec nisipampid Satanasquio bedposh. Bedtanquimbic shocosh bucubimboecnuc nacnenaidën ambi sanamboedën uidën uaposh. ³Uidën uatanquimbic aton yuabo uidën uacno shëcuë aneposh. Adotanquimbic shëcuë

bêtashquioposh puduentiapimbo icnuc. Seta dadpenquio 1000tedi matameshun bêtashte chicshun Satanas cuemenuen adoposh. —Aden seta 1000tedi matamiabi icquin abi uidën uactedembi matses muauaquin icsametiapimbo iquec —queshun chicten bidiacquin uidën uaquioposh. Aden ismeposhi.

⁴Adshumbic utsitsen ismeaposhi. Adoac chuiquidën tsadten icbo-icboec chuiquid dapabo tabadsho ispombi. Esus tantiaquido neposh. Aido Nuquin Papan icmiacpadquid abimbo chuiquido icquin Esusbëdtambi matsesën naid abimbo chuibamposh. Aden matses bëdamboen nameposh. Satanas uidën uacpadembi seta 1000tedi matamequin adoposh. Aido utsi-utsien mapi butiaido uincuemiaido neposh. Aido Esus tantiaquin acte uquëducuësh choboed chuiquid dapabëdta abibimboecnuc nacenaid tantiapimbo icquido neposh. Adecbidi: —Aidën yua nebi —quec aid chuiquid icsamboshë icquid cuëmëdquid dada uadec bësiadtiapimbo icquido niosh. Utsibic mësiadtiapimbo icquido niosh. Adquido icsho icsamboshë icquidon cuesun secaido niosh. Aido Nuquin Papan uincuemiatic tabadposh. ⁵Unësaidotedi uincuemiambo icposh. Nuquin Papan ambi tantiactedi tauaquin uincuemeposh. —Seta 1000tedi matameshun utsibo abitedi uincuemendambi —quequin adoposh. ⁶Adnubien tauaquin uincuemiaido bëdambo yec cuishonqueposh: —Padpidec unëstiapimbo iquebi —quias. —Adquid icquin Nuquin Papan yuabo yec: “‘Esusbëd Nuquin Papa bëdamboshë iquec,’ canuna,” quequin chianequid nendac. Aid seta 1000tedi matamequin Esusbëdtambi utsibo bëdamboen namequid nendac —quequin aden ismeposhi.

Satanasquio chian anëdënquequid nëniaid

⁷Adshumbic aidtedquio seta 1000tedi matameshun uidën uaid chicquin Satanas cuemendac. ⁸Adoquien matses icsamenuec muaquin chiec nidaid utsi-utsiec yacno nidendac. Aden aidën muaquin namiaquien matses dadpenquio Esus chedo cuesun sianuec tsidadendac. Nëdic nidaid Coc caid yacnocquido. Nëdic nidaid utsi Macoc caid yacnocquido. Nëdic matses utsibo abitedi cuëte podotedi dadpenquioshë.

⁹Aidtedi tsidadash cho-choash Esus tantiaquido tabadacnombo Nuquin Papan tantiacnobi Edusaden yacno daquiadshun cuesun secatiadpambo iquendac. Adshobien Nuquin Papan nëdënquepamboecquid budmequin uesquin pichicaindac. ¹⁰Adshumbic aido icsa uamequidtsen Satanasquio bedshun acte uquëducuësh chondaid chuiquid icsamboshë icquidbëdta nidaid shëcuënuësh chondaid ënden nësecaondacnombo chian anëdënquequid Satanastsen nënendac. Adoac aid ënëdenquio yec natiamboshë iquendac. Aden ismeposhi.

Icsambo icquido cuidte chiaid

¹¹Adshumbic padpiden Nuquin Papan matses cuidte ismeposhi. Adoac tsadte nuacquid dapan ushumboshë icquidën Nuquin Papa tsadsho ispombi. —Icsaisambo icquin matsesën naidtedi chuibanquin Nuquin Papan icsambo icquido cuidendac —camenuec adec tsadposh. Icsambo icquido cuidquidquio yec dacuëdampamboecshë Nuquin Papa isadnuc abubëdi nidaid abichobi nibëdanaccosh padpidec isadtiapimbo yec. ¹²Nuquin Papa yacno unësaido uincuemiaido abitedimbo tabadposh. Adnubien bëshunenquio icquin dada

uaten dada uabanacimboen Nuquin Papan abitedi tantiaquid icquin matsesën naidtedi abimbo chuibamposh cuidnumbi. Abi tantiaquido abëdi tabadmequimbi abi tantiesabo comapenen cuidnun aden chuibamposh. ¹³Unësaïdo abitedi icposh. Utsi-utsiec unësacsho chian dapa mad caid nëniaïdo uincuemiaïdo niosh. Utsi-utsiec nidaidën chococaid uincuemiaïdo niosh. Adsho aidon naidtedi Nuquin Papan chuibamposh. ^{14,15}Adshumbic Esus tantiesabo icsho documento nibëdquidbimboecsho abi yacno tabadmenquo icquin chian dapa anëdënquequid uesquin nësecabamposh. Aden Esus tantiesabo nësecan unëstequido utsibo nibëdposh. Esus tantiesabo aton dada unësan abi tantiate tabadacno utsibo tabadenquo icposh. Adnubien Esus tantiaquido Nuquin Papa yacno tabadec unëstiapimbo icquiduidquo icposh. —Adquid iquendac —quequin aden ismeposhi.

Nuquin Papabëd tabadaidquo

21 ¹—Esus tantiesabo chian anëdënquequid nësecaindac —quequin ismeboshombic padpiden ismeoaposhi. Adoac abu chucambo icsho ispombi. Nidaidtsen chucambo icposh. Abubëdi nidaid shëni nibëdnuc utsi chucambo icquiduidquo icposh. Ënden iccondaïd chian dapa mad caidtsen nibëdposh. ²Adnubien Esusbëdi Nuquin Papa tabadaidquo abichobi Edusaden chuca caïd abucüesh budposh. Chïdo nëbi bedboedën aton bënë cuishoncamiacimboec cuishoncamianquid yec bëdamboshë icposh. ³Adnubien Nuquin Papa tsadacnuëshquo comapenec cuëdposh naden chiec. —“Con matses nec,” quïash nëbi Nuquin Papa matsesbëdi tabadendac cuëshëdenquo yec. Adsho

isun aton yuabo icquin matses abitedishun: “Nuquin Icbombo nuqui tantiaidquo nec,” caindac. ⁴Ambo Nuquin Papan abitedi chuca uacnombo aidbëdi tabadec matses shubitiapimbo iquendac bëun ucacimboec. Nïdaïd shënin tabadec abitedi unëstequiduidquo icboedi Nuquin Papa yacnuëshien matses unëstiapimbo iquendac. Adecbidi sedenquetiapimbo iquendac. Adecbidi paëmbo ictiapimbo iquendac —queposh Nuquin Papa yacnuësh onquec.

⁵Adnubien abitedishun Icbombo yec chuquid dapan tsadten tsadquid onquedoposh. —Aden abitedimbo utsi uaqin chuca uaindambi bëdamboshë icnuc —queposh Nuquin Papa Esusbëdi. Adshumbic ëbi chuiposh. —Ëmbi aden chuiboed dada uata. Ëmbi miesambo icquin abimbo chiaïd nec —queposh Nuquin Papa Esusbëdi.

⁶Adashic Nuquin Papa padpidec onquec: —Ëmbi chuiboctedimbo nainquin naindambi utsibon: “Padi,” catiapimbo icnuc. Ëndenquimboshë nidaid uabi ictenedi nebi. Nëbi adquid yec nibëdantiapimbo icquid nebi. Adquid yec abitedishun Icbombo icquin ëmbi tauaidtedi nainendambi. Adquid icquin acte bunacimboec ëbëd tabadte bunquidon con Mado Esus tantiasho ëbëdi tabadmendambi. ⁷Satanasën: “Chieshtomenu,” cauidaïdo Esusbëdta ëbi chieshtoenquo icquin tantiaquido ëbëdi tabadmendambi bëdamboshë yacnombo. Ëbi papa casho: “Ai, con mado mibi nec. Con champi mibi nec,” caindambi. ⁸Adshumbic utsibo chian dapa anëdënquequid icsamboshë nuadquid nësecaindambi. Nëidtedi icsamboshë icquido adoendambi. Nëidic ëbi bëdiactsëc tantiauidtsëcboedobi chieshëmënnquidon: “Cuesnu,” cac chieshtoash tantiesä yanoaïdo. Nëidic

Esus tantiesabo abitedi. Nëidic icsamianquido. Nëidic chieshëmë nec cuesunianquido. Nëidic dada aton dada utsibëdi chichudnanquido. Nëidic aton chidopenquio chudquido. Nëidic aton bënëpenquio chudmequido. Nëidic nënëchoquidobëdtabi cuëte podon unës uante bunquido. Nëidic ambi nacnenaidi papa caquin tantiaquido. Nëidic muauanquido. Aidedi chian dapa anëdënquequid nësecaindami —queposh Nuquin Papa.

Abi tantiaquido Esusbëd icte chiaid

⁹Adnubien mayan bëdan Nuquin Papan matses cuidte cushtoaid chiuimboed abentsëc choshon chuiaposhi. —Isec cho. Chido nëbi bedboedën aton bënë cuishoncamiacimboen abided cuidadec unësaid Esus cuishoncamequido tabadaid mibi ismenu. Cho —caposhi Esus tantiaquido ismenuen.

¹⁰Adshumbic Nuquin Papan Mayanën tantiamiac ushquin isacimboen isombi. Mayan bëdan ëbi buanquin ispombi. Aden buanshun macuësh dapa mananënquio tsadumposhi. Adoac anoshon isquien abucuësh Nuquin Papa abi tantiaquidobëd abi tabadaid abichobi shubu dadpen icquid budposh. Aid tabadaid Edusaden chuca caposh.

¹¹Aid tabadaidquio aid shubutedi Nuquin Papa tabadaid yec abi yacpadquio abichobi bëchamauanquiecposh. Casëdu bëdambo icquidbimboec isquid-isquidquio isadposh. ¹²Shubu abitedi nënantan icnuc abichobi daquënë uaid icposh. Abucquio icnuc daquënë uaid niosh. Daquënë uaid puduedte shëcuë 12tedi icposh. Aid shëcuë icbo-icboen isquid yec mayan bëdabo 12tedbidi icposh. Aid shëcuë bëtashte 12tedbidi icposh. Aid

bëtashten Acobon mado cuëmëdquid 12tedbidi dada uabampaccosh naden. Bëtashten Acobon mado Ose cuëmëdquid dada uatanquin bëtashte utsin Acobon mado utsi Uda cuëmëdquid dada uatanquimbic adenuidi bëtashten bëtashtenquien Acobon mado cuëmëdquid cuëmëdquidquien dada uabampaccosh. ¹³Aid daquënë uaid puduedte shëcuë ushë choauc 3tedi icposh. Ushë nibëdauc nodte yauc aidedbidi shëcuë icoaposh. Ushë nibëdaubidi sud yauc aidedbidi shëcuë icposh. Ushë budauc aidedbidi shëcuë icposh. ¹⁴Ambo tauaquin daquënë uadoquin nidaid cuënote nuamboshë icquid dapa 12tedi bedshun Esusbëd icquido ëbitedi cuëmëdquid 12tedi aid cuënote dapan abentse-abentsen dada uabampaccosh naden. Cuënoten ëbi cuëmëdquid Uan dada uatanquin cuënote utsin Petedo cuëmëdquid dada uapaccosh. Adenuidi cuënoten cuënotenquien Esusbëd icquido cuëmëdquid cuëmëdquidquien dada uabampaccosh. Adoshombic nidaid uëdëshcabanshun tauaquin sandoshon cuënote utsi tsindoid aid daquënë uaid niosh. —Esus tishabi icnuc Nuquin Papa tantiapampidobëdi Esus tantiaquido Nuquin Papa yacno Esusbëdi tabadendac —quequin tantiamenuen Acobon mado cuëmëdquidotedi dada uaidbëdta Esusbëd icquido cuëmëdquid dada uaid aden ismeposhi.

¹⁵Adshumbic ëbi chuiboedën mayan bëdan shocosh bëdaidquio nacnenaid tambante sanamposh. —Nuquin Papa tabadacno tambanquin daquënë uaidbëdtabi puduedte shëcuëtedi tambanten tambanu —queposh.

¹⁶Adoshombic cuëma abitedi tambanac cuëma tiombi-tiombimboec icposh. Cuëma auc abentsëc tanac

quidometedos 2,200ted cactiombi
iccosh ënapenquioshë. Aidtionuidi
iccosh cuëma abitedi. Adoshombic abuc
yacmi cuembotsen tanac
aidtionquiobidi icposh. ¹⁷Nidaid
cuënote nuamboshë icquid dapa
tsindoquin daquënë uaid bitsipambo
icquidtsen tanac nuamboshë bitsi
icposh. Matsesën nacnenaïd tambanten
tanac metedos 65ted cactiombi icposh
nuamboshë bitsipambo.

¹⁸Daquënë uaid abichobi
isquid-isquidquio isadposh. Bëdamboshë
icposh. Padnuen shubu abitedi shocosh
bëshpiu-bëshpiuctsëcquid
nacnenaïduidquio yec nac-nacquio
icposh. ¹⁹Aid daquënë uaquin tauaquin
sandoaid nidaïd cuënote dapa
casëdubimboecquid bëdambo icquid
matses comapenec bunaidquio
utsi-utsien dabitaccabanaïd niosh.
Abentsëc aspe caïd
umu-umumboctsëcquid
dabitaccabampaccosh. Utsibic sapido
caïd umumbo icquid
dabitaccabampaccosh. Utsibic acata
caïd ushumbo icquid. Utsibic esmedada
caïd umumbo icquid utsi. ²⁰Utsibic
onise caïd piumbo icquid. Utsibic
conadina caïd piu-piupactsëcquid.
Utsibic quidisodito caïd
bëshpiu-bëshpiupactsëcquid. Utsibic
bedido caïd umu-umupactsëcquid utsi.
Utsibic topasio caïd piu-piupactsëcquid
utsi. Utsibic quidisopadasa caïd
nushan-nushanacbitsecquid. Utsibic
asinto caïd umumbo icquid utsi. Utsibic
amatista caïd umumbo icquidbidi.
Aidtedi dabitaccabanaccosh. —Nuquin
Papa yacnombo bëdamboshë iquendac
—camenuen aden ismeposhi. ²¹Daquënë
uaid puduedte shëcuë 12tedi icposh.
Aid bëtashtetedi acte
chiumbimboecquidën casëdu ushu uaid
nuacquid dapambo abichobi-abichobien

nacnenaïd niosh. Ambo shubu dadpen
icquid nënantanquio podqued icposh.
Aid podqued shocosh
bëshpiu-bëshpiuctsëcquid
acte-actectsëcquio icnuc mabiunaïd
icposh. —Esusbëd Nuquin Papa
tabadacnombo bëdambo icquiduidquio
iquendac —camenuen aden ismeposhi.

²²Ambobi abi bëisec tabadacnombo
Nuquin Papa tabadte shubu uashunaïd
nibëdposh. Ambo Nuquin Ico Esus
abided cuidadec unësaïdbëd Nuquin
Papa icsho bëisquioquin tantiec
anocquido tabadendac. ²³Ambobidi
inchështanec badiadenquio iquendac.
Badiadën ushë isadenquio iquendac.
Inchëshën ushëtsen isadenquio
iquendac. Nuqui icsaïd bedshunuec
abided cuidadec unësaïd Esusbëd
Nuquin Papa bëchamauanquieccquid
icquin ambo ushëmboudi icmendac.
Inchëshaid tantiadenquio iquendac.
—Nuquin Papa icsaisambo icnuc abi
yacno icsaïdo nibëdquio iquendac
—camenuen aden ismeposhi.
²⁴Icsaisambo icquin Nuquin Papan
tantiamiac matses utsi-utsiec abi
chuiquid dapabobëdi Esus tantiaquido
yanendac. Adash Nuquin Papa
yacnombo quenenecc tabadcuenash:
—Esusbëd Nuquin Papa abitedishun
Icbombo nec. Abipadquid utsi nibëdec
—quendac. ²⁵Nuquin Papa matsesbëdi
tabadacnombo inchëshenquio icnuc:
—Icsambo icquido puduednushe.
Bëtashnu —quetiapimbo icsho isun
daquënë uaid shëcuë bëtashenquio
iquendac. Shëcniacchobi iquendac.
²⁶Padnuen nidaïd utsi-utsiec yacno
tabadquido chuiquid dapabo Esus
tantiaquido yanash Nuquin Papa
yacnombo puduedash: —Daëdpactsëc
tantiaquin matses daëdpactsëc
namebampadenembi. Nuquin Papa aton
Mado Esusbëdi comapenen

tantiaquidquo yec abitedishun Icbombo nec. Abipadquid utsi nibëdec —quendac abitedi. ²⁷Ambo icsambo icquid puduedtiapimbo iquendac. Adecbidi omposhon abi bunaiduidi naquidobëd muaquido puduedtiapimbo iquendac. Nuquin Papan bëshunenquio icquin dada uacimboen: —Icsambo icboedi abided cuidadec unësaid con Mado Esus tantiaquido aido nec. Con bacuëbo nec —capendac. Aden ambi con bacuëbo caido abi yacno puduedendac. —Nuquin Papa yacno adquo bëdamboshëuidquo iquendac —quequin aden ismeposhi mayan bëdan.

Nuquin Papa yacno acte ismiaid

22 ¹Adshumbic aid mayan bëdan padpiden ismeoaposhi. Adoac Nuquin Papa abided cuidadec unësaid aton Madobëdquido tsadte dapan tabadacnuësh matses unëstiapimbo icmeteuid acte bëdambo icquid nushan nibëdquidquo chëuëdsho ispombi. ²Nuquin Papa yacnuëshquio choec chëuëdec ambo tabadquido Esus tantiaquido tabadaid shubu nënantanquo chëuëdposh. Aid cuëmambi matses unëstiapimbo icmeteuid cuëtetsen icposh. Baded-badedquiec bacuëquidquo niosh. Inchëshën ushë choan-choanquiec badedquido bacuëquid niosh. Aid cuëte podo nidaid utsi-utsiec yacno tabadquido bëdambo icmeteuid niosh. —Aton Mado abided cuidadec unësaid tantiaquido abëdi tabadmequin Nuquin Papan unëstiapimbo icquid icmendac —camenuen aid acte ismeposhi. —Matses utsi-utsiec Esus tantiaquid icsho abëdi tabadmequin Nuquin Papan daicsabudtiapimbo icquid icmendac —camenuen cuëte aton podobëdta ismeposhi. ³Aden abitedi bëdambo

icmiac cuidtequido nibëdquio iquendac. Icsambo icquido nibëdnuc Nuquin Papa aton Mado Esusbëd tabadacnoshon aid daëdi tantiaquiec Esus tantiaquido tabadendac. ⁴Adec: —Con bacuëbo nec —quequin Nuquin Papan abi cuëmëdquid dada uaquin bësiaidon Nuquin Papambo bëisquiec tabadendac. —Nidaidën tabadec bëdamboec tabadquido Nuquin Papabëd tabadec abipadquio bëdamboshë yanendac —camenuen aden ismeposhi. ⁵Ambo bëdambouidquio yec inchëshenquio iquendac. Nuquin Papa bëchamauanquiecquidëmbi ushëmbouidquio iquendac inchëshaid tantiadenquio yec. —Aden abi tantiaquido bëdamboen isquin ënenquio icquin bëdamboshë icmendac. Chuiquid dapabo icmiac Esusbëdtambi ënenquio icquin namendac —quequin ismeposhi.

⁶Adshumbic mayan bëdan chuioaposhi. —Tantia. Mibi chuinu. Nuquin Papan Mayanën tantiamiac: “Yuecash adquid iquendac,” quequin min tsusedpabo isadaidbon abimbo chuiquin dada uapampic. Adembidi aton Mayanën namiaid icquin abimbo chuiquin mibi dadpen ismebanombi. “Nëbi adquid iquendac. Utsi yuecash iquendac,” quequin mibi tantiamenuen ismebanombi —queposh Nuquin Papan abi yacnoshon uaid mayan bëda.

Esus chote chiaid

⁷Adnubini Esusënquio naden chuiposh. —Chieshtoenquio icquin ëbi tantiata. Nëbimbobi nidaidën choec budebique. Nëid dada uaid isquin ëbi tantiaquiota. Adsho mibi bëdambo icmendambi —caposhi Esusën.

⁸Uan nebi. Abimbo chuiquin nëid dada uaombi. Aden mayan bëdan chuibanquin ismeposhi. Aden ënquimbi ismiaquini: —Nuquin Papapadquidien

nechitec —quetanec danëshën
tinquebuduidpoc ëbi ismequid mayan
bëda ismenuec. ⁹Adshobini: —Padi.
Aden ëbi ismenda. Mibipadquid Nuquin
Papan yuabidi nebique.

Ëndenquimboshë Nuquin Papan
tantiamiac min tsusedpabo isadaidbon
ambi chiaidquio dada uapampic. Nëbi
ëmbi ismeboed tantiaquin Nuquin
Papan chiacpadomboen naquido aton
yuabobidi nec. Adquidbidi nebi aton
yuambo. Nuquin Papauidtsëqui
tantiaquin aden ismeta —caposhi
mayan bëdan.

¹⁰Adashic padpidec: —Ëmbi
chui bamboedbëdta ëmbi ismeboedtedi
chuiquin dada uata. “Nëid dada uaid
isec onquequin ma Esus tantiaquidon
tantianu. Nëbi adquid yanushe.

Chieshtoenquio icquin Esus tantiec ma
tabadnu,” qeshun dada uata.

¹¹Nëbimbobi Esus chonoc Esus
tantesabo badedquio bëdamboec
tabadcuentiapimbo iquendac. Abi icsaid
badedquio ëntiapimbo iquendac. Esus
tantiaquido abi bëdamboec
tabadacpadquiecbidi bëdamboec
tabadpashun —queposh mayan bëda.

¹²Adnubini Esusën chui oaposh.
—Chieshtoenquio icquin ëbi tantiata.
Nëbimbobini choendac. Choshon
matsesën naidtedi tantiaquin icsaido
cuidquimbi ëbi tantiaquido ëbëdi
tabadmendambi. ¹³Nuquin
Papapadquidquio nebi. Ëmbi
tantiacmaid nibëdnuc abitedi
comapen tantiaquidquio nebi. Nidaid
uabi yec ictenedi nëbi adquidquio yec
nibëdantiapimbo icquid nebi. Adquid
yec abitedishun Icbombo nebi.

¹⁴Icsambo icboedon ëbi tantiasho
icsaisabimboecnuc Nuquin Papan
bëdamboen isendac. Adshun ëbi
yacnombo puduedmequin unëstiapimbo
icquido icmendac unëstiapimbo

icmiantequid cuëte bacuë
chemiacbimboen. ¹⁵Padnuen ëbi
tantesabo bëdamboen isacmaido
Nuquin Papa yacno puduedtiapimbo
iquendac. Nadquid icsambo icquid
caimbi. Nëidic nënëchoquidobëdi cuëte
podo chodcashun unës uante bunquido.
Nëidic dada cuididimbo. Nëidic chido
chishpida. Nëidic aton chidopenquio
chudquido. Nëidic aton bënëpenquio
chudmequido. Nëidic cuesanquido.
Nëidic papa quequin ambi nacnenaidi
tantiaquido. Nëidic abi bunaiduidquio
naic muauanquido. Aidedi Nuquin
Papa yacno puduedtiapimbo iquendac.

¹⁶Ëmbi chiacpadomboen mayan
bëdan mibi ismebamposh. “Ma ëbi
tantiaquidon iste dada uanu,” quequin
ëmbi chiacpadomboen mibi
ismebamposh. Nuquin Papan dada
uamiac matsesën: “Dabidën tsyuecquid
yec abitedimbo chuiquid dapa
iquendac,” quequin chui pampid nebi.
Isadaidbon cainaidquio nebi. Utsin:
“Dëniacnu,” cadtiapimbo icquid nebi.
Adquid icquin matses abitedimbo
namendambi —quequin chui poshi
Esusën.

¹⁷Adsho tantiashun Nuquin Papan
Mayanën tantiamiacpadomboen
chuiquin: —Nëbimbobi Esus chonoshe.
Aidquio tantiabenta —caindac Esus
tantiaquidon Esus tantesabo chuiquin.
Ëmbi chui boed tantiaquidtedishun:
—Nëbimbobi chonoshe. Aidquio
tantianuna —cac bëdambo ictsiash.
Adsho tantiash Esus tantesabo acte
bunacimboc Esus tantiате bunsho
Nuquin Papan bëdamboen isendac.
Nuquin Papa bëdamboen ismenuen
menete nibëdnuc Esusuidi tantiasho
Nuquin Papan bëdamboen isquin abëdi
tabadmendac.

¹⁸Tantia. Ëmbi chui boed tantiaquido
chuinu. Nuquin Papan: —Nadquid

iquendac. Yuecash utsi iquendac
—quequin ëbi ismeboedtedi dada
uaombi. Ëmbi dada uaboed tsitënquin
ambembi chiaid dada uainda. Ëmbi
chuibocpadomboen Nuquin Papan mibi
cuidtsiashe. ¹⁹Adembidi ëmbi dada
uaboed utsi uainquo icquin abimbo
chuita. Ëmbi chuibocpadomboen
Nuquin Papan mibi unëstiapimbo icquid
icmenquo ictsiashe. Adembidi
bëdamboshë yacno abëdi mibi
tabadmenquo ictsiashe.

²⁰—Ma aitedi tantianu —quequin
Esusën chiacpadomboen mayan bëdan
aitedi ismeposhi. Ëmbi
chuibocpadomboen Esusën:
—Nëbimbobini choendac —caposhi.
Adsho tantiashun: —Ai, nëbimbobi
chota —capombi.

²¹Mibitedi Esus tantiaquidotedi
tantiaquin: —Ambi nabocpadomboen
Nuquin Icbo Esusën bëdamboen isquin
bëdambo icmepashun —caimbi. Padi.
Aitedi chuiquin dada uaombi.